

四明談助目錄

第十九本 東外護
奉象

卷四十三

東外護上 錄 奉象諸山以至沈家門總水口古蹟提綱

安巖山 述 寶慶志 安巖寺 錄 四明山志 又錄 住僧清聳傳

蓬島山 述 四明山志 錄 宋劉俊明張瓚詩 又 句餘土音

蓬萊山貢土歌

鰲魚潭 靈濟泉 述 曹志

石樓山 述 四明山志 錄 明袁德隣詩邵以貫羅夢章避地事

西溪 長汀塘 述 曹志

剡源山 述 四明山志 錄 元陳基詩 并 句餘土音毛竹洞天詩

四明談助 卷四十三

目一

剡源一曲 至 九曲 并 元陳基 明高啓詩 俱錄 四明山志 錄又

全謝山剡源詞序九曲詩 記 王大令寓剡溪事李梅岑寓

三石村傳 又 周貞靖事詳新莊周氏下

白石山 述 四明山志 附 新按 華頂山 三台 日嶺 俱述

曹志

鳳山印山 奉化縣治 俱述 曹志 又記 泉口村禦金人事 記

鄉名禽孝 并 義馬殉主故事

青錦山 寶化山 文筆山 奉化縣學 龍津書院

舒文靖理學 俱述 曹志

忠節坊 戴拾遺殉難 戴項氏焚譜事 俱述 曹志 名

賢六人 採 萬季野名賢錄

天門山 大洞山 梅山 新嶺山 獅子巖 黃溪渡淡

港渡 俱述 曹志兼見下卷

徐鳧巖 述 四明山志 附 新按 錄 沈嘉則汪長文詩

棲霞坑 立石嶺 附 新按 御麥 述 錢志

大小晦山 雉嶺 桃花坑山 述 四明山志 附 新按并辨

胡乘龍倡亂雪竇 述 錢志

雪竇山 述 四明山志 曹志 錄 宋樓攻媿詩

千丈巖飛雪亭 述 山志 錄 王半山曾子固鄭安晚詩

雪竇資聖寺 述 四明山志 曹志 附 新按 錄 宋眞宗仁宗勅命

歷朝名人題詠 并 寺僧常通 延壽 重顯 韓大伯

曇穎 知和 懷賢 守卓 智鑒 法恭 智融 師

四明談助

卷四十三

目二

範 炳同諸傳 又 天開圖畫閣記 妙峯亭記 并 詩 退

禪師居妙峯記 并 詩序 古跡含珠林 錦鏡池 青鎖

亭 百步街 入山亭 寒碧亭 望官曲 御書亭諸

記 并 詩 又 寺外奉慈寺 中峰菴 安坐巖 乳峯庵

雲外菴 西麓菴 俱錄 四明山志

三隱潭 并 詩 述 四明山志 又錄 沈嘉則遊記黃梨洲過雲木

冰記 又 翰林松 并 戴愚齋逸事

爛平山 述 四明山志 并 樓攻媿騷詞 溪口崎山 俱附 新按

塔亭山 岳林寺 布袋和尚傳 俱述 曹志

金鐘山 述 曹志 并 新按 金鐘潭 述 成化志

孝感山 銅山 漢城山 俱述 曹志 篠楸山 述 曹志 附 新

按

卷四十四

東外護下錄 象山諸境并渡海至普陀古蹟提綱

台明嶼述 成化志 石門嶺 界嶺 橫山俱述 曹志

蒙頂山 淡港渡述 成化志曹志

青龍山 五雷山 北港 大雷山 黃溪渡 智門寺

俱述 曹志

煉丹山述 成化志 仙掌巖 石屋異蹟述 曹志 栖霞

觀述 成化志

象山述 成化志望海樓觀瀾亭白鹿飲泉亭俱述 曹志

象山縣治 東西澄二河 望稔樓 竹籬茅舍俱述 曹

四明談助 卷四十三 目三

志

象山縣學述 曹志錄 元鄭覺民詩又 句餘土音賦林大令

詩

俞推官忠烈 蔣助教兄弟講學述 成化志 蔣王二士

合謀殺賊述 曹志又錄 錢唐俞士吉二賢

鄭行山 梅溪山 圓嶠亭 梅溪河 鳳躍山 鳳躍

溪 方壺亭俱述 曹志

等慈寺述 成化志 潘頭陀述 曹志

獅子山 玉几山 海眠 雙蓮池俱述 曹志

史氏紅木犀花述 寶慶志又錄 宋高宗詩二首 湖制使

史忠定次韻七古詩四首 句餘土音詩一首

姜嶼山 烏嶼山 珠山 金蛤潭 屏風山 佛頭山

常樂寺 黃刺史墓俱述 曹志

仙跡巖 錢倉所 爵溪所 清潭山并 禱雨靈跡俱 曹志

龍角山 白蠡潭 五師山述 曹志 靈巖山 三萼山

后門山述 曹志附 新按

昌國衛述 成化志 曹志 平沙巖 東門山 于綰山 玉

女山俱述 曹志

石浦所述 成化志 曹志 張將軍名振傳 鮎埼亭集又 句

餘土音詠通侯女詩

婁秀才死海上採 鮎埼亭集 南田述 曹志附 新按

陳元帥廟述 曹志 桃渚萬將軍廟已見 四十二卷

四明談助 卷四十三 目四

韭山 大薤山 普陀山 桃花山 朱家尖山俱述 曹志

附 新按

大小洛伽山 蓮花洋俱 曹志 寶陀寺述 寶慶志成化志

潮音洞 善才洞 盤陀石俱 成化志 東海古跡節錄

元吳萊記 三摩地 眞歇巖 獅子巖俱 成化志 清

淨境亭錄 宋潛溪記銘 普陀寺怪事述 曹志 洛伽小

白華述 寶慶志錄 句餘土音寶陀詠三首

普濟寺 法雨寺俱 曹志 沈家門述 曹志附 新按

四明談助卷四十三

鹹塘滙齋課餘



東西四明之脉謝山所稱正派支派爲府治朝坐
詳于上其外護則奉化象山以至普陀山俱東四明脉慈谿
鎮海以至定之舟山俱西四明脉二脉交會于沈家門爲出
水總口茲先詳東四明外護其自鎮亭山南來歷三嶺起三
望山北行者爲四明正脉已見第三十七卷自鎮亭山東行
經白杜起金峨諸山爲東四明護脉已見第三十九卷而連
山爲鎮亭宗派繞于奉邑之前剡源爲鎮亭支派環于奉邑
之後華頂三台日嶺青錦青亭爲奉邑主山南有寶華文筆
諸山自南而東爲天門大洞名山梅山新嶺山獅子山至金
峩交鄞界西有徐鳧巖大小晦雪竇爛平諸山北至溪口畸
四明談助

卷四十三

一

鎮亭山

山下止自北而東爲塔亭金鐘孝感銅山漢城長短嶺篠楸
山度江至茅山入鄞界凡城郭里第未經徧歷不及詳所有
古蹟事物詩歌遞詳于後

鎮亭自第一尖來爲東四明之祖北行歷棲霞三折躊躇等
嶺起三望山趨郡治爲正脉已詳三十七卷

安巖山

奉西南三十里來自四明山有二巖橫跨澗上中有大龜廣
三尺許每出入風雨隨之後死殼留四明院中

寶慶志

安巖禪寺

漢乾祐二年僧清聳建名四明院宋天聖中徙入山慶歷間

改安巖法華院今爲寺有亭曰攬秀

四明山志

清聳福州人閱華嚴得悟止明州四明山卓菴節度使錢億執事師之禮忠懿王命于臨安兩處開法後居靈隱上寺署

了悟禪師

四明山志

安巖蓬島二山據宋志俱云來自四明山但四明主山未知所在自沈勾章遊四明始以大俞山之四石穴稱石窻而其地自大俞村反下數里始至四山環繞無從望遠恐非謝遺塵所稱之處好古者當依宋志從安巖蓬島之源覓之庶得其實

蓬島山

圖經云其源來自四明山重岡複嶺自剡之西南至于鎮亭

四明談助

卷四十三

二

之東北兀然獨冠諸山北爲安巖之翠峯南爲石樓之赤巖過杉木嶺入于天台其巔俯視數百里外滄海城邑了然在目宋崇寧間有尼結廬于其側號師姑坪有龍湫名鰈魚潭在後萊山谷中宋祥符淳熙皆著靈異

四明山志

在奉南四十里爲

邑之遠案

曹志

宋劉剡詩軋軋筍輿過翠微路經蓬島鎖烟霏雨從半嶺巖窩出雲在行人脚下飛

明張瓚詩振衣千仞恣遨遊舉目俄驚近斗牛雲鎖赤巖低雁宕天浮滄海小瀛洲謝安自得間中趣徐市何須海外求
瑶艸碧桃如舊日獨悲秦輦覆沙邱

句餘土音蓬萊山貢土歌

詩話此奉化之蓬萊非象山之蓬萊也而宋時取以築社見乾道四明志

方邱之士取五方五岳五社胥來同吾鄉屬在五鎮是爲五岳副不應入貢大社中何以宋家作貢列載圖經雄當年十國各分據藝祖一出始同風相將神啣圖旅獻東都東乃取十國土以鳩方邱工十國山川亦已多拔其尤者入郊宮吳越軍州十有四四明天台稱神叢蓬萊高踞鎮亭左厥土奇淑氣熊熊南有石樓之赤柱北有安巖之翠峯是爲四明天台界滄瀛城郭一望皆可窮下有深湫產神龍吳越王稽首頓首遙呼嵩特遣陪臣將命來發重雲剗夜聞富媪呼山鬼被除塵霧清若空洞天百仙齊上謁審視何處靈最鍾或如

四明談助

卷四十三

三

鰈魚潭

在後萊山谷間南與石樓山烏潭相望東爲東山玉沙井北直安巖山白巖窩皆早曠雩禱之所潭徑二丈餘深廣如其流縈繞松林金溪二鄉漑田甚溥出富潭港與鎮亭水合而入江宋祥符間有漁者沿流擲釣至潭所俄有魚隨釣而上五色斑斕而有一翼漁者駭急棄于潭歸語鄉人翊日有紅光燭天會歲大旱鄉人合禱之歲則大熟于是鄉之父老相

與立祠祀之曹志

靈濟泉

縣西南一里昔有牧童浣衣入泉得巨鰻持歸鬻爲九段良久失去急往泉所視之而鰻成九節復游泉中邑人靈之宋元豐中令向宗諤開浚歲旱致禱得九節鰻雨立沛然宣和中令周因構亭其旁立碑以紀其异明時致祭今因之曹志

石樓山

與蓬萊島相近有石如屋兩崕跨澗飛瀑亂下又名石柱高六百丈 五代時雪川胡慶度奉化童公嶺得石樓蓬島之勝遂定家焉慶左丞進思子也四明山志

明袁德隣詩仙山十二石樓開下瞰滄溟渺一杯綺后未明

四明談助

卷四十三

四

初日上丹梯欲冥暮潮來身通雲路登三島手摘星辰泝上台元是龜龍將變化桃花浪暖錦成堆

老頭陀遊山得伴

邵得魯先生以貫餘姚人國難大作先生欲死以其母在不得遂削髮爲頭陀走入雪竇山中有妙高臺僧道巖者故鄞廣文張廷賓亦姚產先生依之苦身持力不與人接故御史高公斗樞物色之曰异人也遣其二弟與之遊周囊雲亦以僧服居白坑時時過從爲伴已而以省母返居潭上園黃忠端第三子澤望志節夙與先生近至是同居園中相與讀書至謝臯羽遊錄而慕之于是徧遊山中然山寨方不靖所在亦多邏卒而二人者冠服奇古躑躅其間頻遭詰難顧不以

爲苦一日忽入絕谷不知所向方茫然求故道不可得俄而
峯迴路轉松梧桐竹甚盛有雞犬聲趨就之祇一家中有幅
巾者出曰客從何來則語之以宅里笑曰吾亦姚人也避世
居此不虞君之涉吾地也乃止宿則告曰此石屋山也僕故
孫公碩膚監軍陳從之者也孫公死海上吾無所依來此山
中未嘗與世人接也因相顧而歎曰是真桃源矣未幾澤望
卒先生孑然無所向遂棄家投四明山中之楊菴時尚有一
妾不忍判先生去亦爲尼于菴中一日之中晨昏各上堂禮
佛此外雖粥茗不相通久之皆卒于菴

結埼亭集

橫山

截山爲路二十五里山上有石文若篆書謂之天篆旁有石

四明談助

卷四十三

五

臺有上下牢巖上巖壁立下巖回顧

四明山志

奉西四十里由鎮

亭山來

曹志

宋劉俊詩桐林老子俗情無覽勝探奇不覺晡幸爾清溪好

明月如行四十里冰壺

其一

一溪徑險僕夫劬三酌油油醉筍

輿隔岸火焱三四點不知誰照夜灘魚

其二

大小萬竹望不見

上下牢巖過若飛紅綴舞衣山躑躅白裁玉版野薔薇

其三

萬竹嶼

宋高元之著書之所也元之字端叔讀書靡不究極陸放翁

于文章少所許可以詩人稱端叔

四明山志

山自鎮亭來奉西南

六十里高元之本鄞人以父修職郎世埴葬奉之察廉岡因

居于是

曹志

吾鄉萬竹詩種發芽于高公端叔端叔本中原將

家右族扈從南來以邱壘在萬竹察廉岡愛而居之學者因尊稱之爲萬竹先生此記詳見剡源集高隱學採入敬止錄後門人葬萬竹于蔣山傳見第三卷蔣山下

明袁德隣詩萬箇篔簹旋養成深林日夕好風生故人對面無塵俗君子同心有舊盟翻翠五更驚好夢鏘金三伏咤秋聲何當跨鶴隨王于直上瑤臺聽玉笙

小萬竹山居故少參羅公夢章避地處也少參蜀人司李吾鄉實佐錢忠介公起兵亂定蜀道尚梗無地可歸遂居山中少參雖解官于士大夫往來山中者猶能通緩急之宜當卽其山房爲祠而配以故鄞令袁公州佐以其衛東錢湖之功

也

鮚埼亭集剡源詞跋

四明談助

卷四十三

六

西溪

統名縣溪

自鎮亭山北流出柏溪經牢巖至縣西南謂之西溪轉由綠荷灘至會通惠政二橋謂之龍溪北下長汀爲七十二曲遶連山松林長壽奉化四鄉漑田甚多

曹志

長汀塘 透瓶泉

縣東北八里捍縣溪水南接栗樹塘北至金鐘墩塘之上爲驛路相傳長汀七十二曲繞連山下四鄉今長汀塘無七十二曲自鎮亭發源至進林磳皆四鄉之境有七十二堰豈謂是歟

曹志

成化志

三里以甕器貯之水透瓶外故名

透瓶泉在縣東

剡源山

奉化之西六十里有山夾溪而出蒼然深茂者剡源山也謂之剡源者以其近越之剡縣名之也剡源之溪以曲數者凡九梅福四明山記曰一澗由南過一百二十里其水歸鄞江南源是四明山南門也號白溪四明山志元陳基詩海上雲山罨畫青剡源曲曲有仙靈四時笙鶴聞空際彷彿曾孫宴幔亭句餘土音毛竹洞天毛竹行

詩話毛竹洞天在剡中然奉化之雪竇亦有毛竹其洞天
之同岑歟

吾鄉到處風竹清百千種類不可名第九洞天有南戶獨以毛竹署金庭金庭爲四明之南天台之北其支山與雪竇連渭川千畝僅凡骨淇園

四明談助

卷四十三

七

亦復無神靈釀以剡源之絳雪凍以沃州之明冰或如飛鳳翥可攬或如蒼龍髯可乘或如兔毫磔山窟或如鴻羽落沙汀有筍白如銀閃閃有竿黃似玉琤琤疾風怒號籜不驚長爲山人護山扃支山連雪竇寒林亦杳冥雪竇毛竹銀筍見梅子真四明記試取巨圍作竹屋風饜雪飫可千齡長生久視非吾學每愛此君思大嚼試將此君烹花猪世間真有揚州鶴

一曲

在六詔有王右軍廟右軍隱于此六詔不起故名山有硯石云右軍所遺也四明山志剡源盡處爲剡界嶺嶺西水出曹娥江相傳嶺北有山高出衆山之上土人稱曰四明山地下但聞水聲而不見水有石窻可凭高望遠不同大兪村之石窻也

未審其實

元陳基詩一曲溪頭內史家清泉白石映桃花當時堅臥非
邀寵六詔還朝百世誇

明高啓詩欲知溪流長百轉來越嶠舟行安能極嵐路入斜
照清景不足娛昔人豈辭詔石硯久難磨空靈閉遺廟

二曲

在蹕駐五代時陳殿中隱于此吳越忠懿王親往顧之故有
是名按史忠懿卽位之後未嘗東渡浙河豈其在出鎮台州
時耶四明山志錢王廟前有分支小溪十餘里入均堂塢孝義菴
等處境特幽異

陳基詩二曲山頭艸木芳錢王駐蹕有餘光故家喬木今無

四明談助

卷四十三

八

恙禮樂衣冠比鄭鄉

高啓詩殿中初未仕高節振衰謝讀書在茲邱蕭然竹間舍
王來有深言留宿山水夜誰云南陽翁獨枉將軍駕

三曲

兩湖在桃花坑山之下湖有大石離立去石數百步有潭甚
清冽魚百數頭可數所謂小盤谷也四明山志兩湖水濶如湖多
植榆柳有三石突兀如屋離立湖中竹籊穿石過之桃花坑
不在其中在小晦山地名董村有竺汝舟故居在焉今其子
孫散處不一奉爲總祠詳後小晦山下

陳基詩三曲稜層亂石深儼如盤谷路嶽嶮幘頭突兀波清
淺箇箇魚兒戲柳陰

高啓詩山折水暫開山開水仍往東陂漚初成秋色瀾然廣
碧蘿花葺葺月映石壁上何時試沿洄一理烟中舫

四曲

在臼坑有蓮葉峯爲戴表元故里表元字帥初至元大德間
東南文章大家皆歸之無異辭其自序買榆林之地而廬焉

此也

四明
山志

陳基詩四曲窪然爲臼坑岡巒逾秀水逾清雲深蓮葉峯頭
寺下界時聞鐘磬聲

高啓詩密篠覆碕岸石穴黝而深居人負薪歸駐聽風水音
回看蓮花峯靄靄生夕陰不有僧鐘來高路誰能尋

榷樹灣草瓢故順德令貞靖周公齊曾逃禪處也貞靖同心

四明談助

卷四十三

九

者曰故太常王公玉書故監軍周公元初宜立祠合祀蓬
萊茅菴故觀察節介陸公宇鼎募兵處也舒廣平之後人曰
舒坤翁字方叔者同居方叔畸士王太常爲作傳死于山中
節介挽之詩曰呼嗚方叔不死者心死者身有魂趨東海翩
然朝故君宜祀以配節介結埼亭集
剡源詞跋臼坑山下有淨慈寺寺
前溪路遶轉二三里而陸路自東至西數十步好遊者簾行
自東岸登陸歷遊寺中從容茶話至西岸坐簾綽有餘閒囊
雲居士避地事并雲樹歌俱詳新莊周氏本傳下

五曲

在三石村

詳見丹
山下

陳基詩五曲粼粼三石溪雲深結屋可幽棲羽人輕舉今何

在空有丹霞古字題

高啓詩石洞篝火入石室敷床居白雲開層巔上有丹霞書
神仙不遠人但使粗穢除何必瀛洲外茫茫問鸞車

丹小山有二洞如廣廈可容五六十人內有小穴甚深相傳
窮其洞者行經數時忽聞水聲屢怒惶遽而返有三巨石覆
洞上有丹霞二字自然朱書故洞曰丹霞村曰三石巖隙流
水皆赤或以爲赤水之証下有龍湫民築亭其上爲雩禱之
所有風洞所謂大風有隧也宋陳著曹孝先皆居此有永固
寺唐光啓二年建初名三石院今爲寺四明山志
宋陳著詩丹山高處坐龍宮山下人歸潤澤中北馬一塵飛
不到危時方見有神功

四明談助

卷四十三

十

明汪綸詩溪上栽桃滿洞花洞門石壁掩丹霞茫茫流水空
仙迹寂寂青山度歲華古木垂蘿長拂地野猿生子亦成家
乾坤已入昇平久莫爲秦人理釣槎

李梅岑寓三石村

李國標字君龍號梅岑奉化人高材博學顧耿介絕俗改
步之際始以鄉貢進士入官而事遽去自此不肯妄見一
人鄞都御史林繭庵嘗訪之麥飯葱湯相對話故國事次
日與共遊山賦詩感慨已而鄞高公宇泰做汐社例舉南
湖耆舊之會慎選遺民共得九人故戶剖徐公我庸最長
太常王公玉書次之然皆曰安得梅岑來社中吾輩當讓
之爲祭酒乃相與迎之以病辭不至時往來六詔三石山

中樵子牧豎皆知爲李先生也以壽終結亭巢
有別傳并詩文集序見四十一卷寶林菴寓居下

六曲

在茅渚唐末陳某自長安使吳越遭亂不能還錢氏留爲奉
化尉遂居其地有上乘寺四明山志

陳基詩失載

高啓詩危梁渡清瀨逶迤入前渚犬吠樹蒙籠烟景暗墟聚
雨中耕叟歌月下歸人語欲尋仙尉踪淒涼一茅宇

上乘教寺在茅渚唐咸通九年建名乾符院宋治平二年改

離相院洪武初改寺今廢四明山心

七曲

四明談助

卷四十三

十一

斑溪水會于此有報本寺元大德五年僧正思建四明山志大溪
支港爲斑溪溯流而上通巖頭茅石門等處

陳基詩七曲斑溪好隱居昔人卜築有茅廬至今蘭若諸天
外猶見琳琅烟梵書

高啓詩清溪泛悠悠東與斑溪合菱葉間荷花風來秋颯颯
久行愁寂莫忽有人烟雜我欲發櫂謳漁郎肯相答

八曲

高輿在雪竇山中四明山志雪竇御碑亭山下曰亭下水源一出
剩縣栖霞嶺奉化三折嶺并鳧巖瀑合而繞大小晦山前歸
亭下一出三隱潭千丈巖諸瀑經大小晦山後亦歸亭下亭
下外山爲高輿自剡源山來重巒疊嶂沿溪路旁結一井曰

乳泉其上巖覆若屋罌內溪水亦于亭下統會出公塘大溪
曰溪口溪上市廛數百家百貨咸集奉邑一大鎮也再下卽
蕙江矣

陳基詩八曲灣灣七曲通舉頭金剝鬱重重爲尋高罌雪深
處擬結衡茅學種松

高啓詩俗駕不可到有地罌中小回回別澗通宛宛連岡繞
人家谷林暗不見旭光曉東作起炊藜惟應候啼鳥

剡源山川奇矣然其要會一在小盤谷榆林之交謝遺塵所
云雲南也一在雪竇謝所云雲北也故國初士大夫謀避地
者皆在此二所當僧置祠宇以與宋元諸古蹟相輝映

剡源
詞口

此亦謝山臆度之說所云過雲雲南雲北自應在剩縣唐田

四明談助

卷四十三

十二

至奉化鳧巖一帶余曾親歷見後辨

句餘土音賦洞天乳泉乳

石乳如雲濃躑躅嶺上來更有青銀筍萬竿穿蒼苔皜皜白

蝙蝠倒懸西石臺是誰斲山骨流眞出元胎

吾鄉乳泉非一
處此所賦者高一

罌之乳
泉也

九曲

在公棠與晦溪水合入于泉口注于江山

四明
山志

泉口今稱溪口

陳基詩九曲棠梨歲作花興公手植信堪誇欲知此日誰爲
主隆國諸孫太史家

高啓詩入江水稍決霜降未可涉頗聞往來人出門卽舟楫
前飛鷺鷥遠下飲垂猿捷何處問興公風吹赤棠葉

公棠山舊稱孫興公遊四明山得棠一本植之于此故名按棠卽杜梨興公既有拾梨見之梨洲山矣又稍變其說而爲植棠是一事而分爲二也

四明山志

鮚埼亭集剡源九曲詞序

剡源在奉化西六十里第一曲曰六詔別名左溪有王右軍廟攷右軍宅在金庭其去六詔密邇故別業在焉山中有石硯相傳爲右軍所遺也 二曲曰蹕駐有吳越錢忠懿王祠以訪陳殿中祀焉姚江黃氏曰蓋忠懿未卽位時出鎮台州便道過此也惜乎殿中之名不傳 三曲小盤谷一名兩湖亦名桃花坑石有紋似桃花或竟以桃花實之則謬矣蓋謝遺塵九題中之雲南高士竺汝舟居之元時有孤峯菴所謂四明談助

卷四十三

十三

翰林松者則戴洵所遺也 四曲曰白谿卽榆林有淨慈寺戴帥初所居也居人猶稱帥初爲剡源夫子顧帥初以薄祿受教授之官宜爲黃萬二公所貶當時流寓榆林者曰舒閔風劉正仲高節可師也帥初愧之矣當立祠以祀舒劉二子

五曲曰三石卽丹山赤水洞天也曹放齋居焉放齋事李莊簡公卽爲其壻莊簡師元城以接涑水之薪傳大儒弓冶所在而爲道家所攬又未幾而爲永固寺三教流轉日失其正宗矣舊有祠以祀放齋因及其子之殉節楚州者而附以泰宇今皆無矣是乃九曲中第一事烏可以不復也 六曲曰茅渚陳本堂之故居也有上乘寺陳氏之子孫誇其先世歷岸三尙書之名德而宋史無之深爲可疑據袁學士集斷

陳氏之著者始自本堂則三尙書俟更攷矣 七曲曰斑溪
有報本寺舊志自寺而外一切故蹟無見按本堂集則斑溪
故家爲董氏有隱君董聲仲者其祖手植檜甚古聲仲築延
靖堂以表之足以補諸公之遺 八曲曰高畧卽雪竇也是
山亦至宋始著而今于九曲中爲最盛 九曲曰公塘舊志
誤以爲公棠姚江黃氏疑之以爲既有梨洲復有公棠梨卽
棠也曾是一興公而百里之內分據二山然不知公棠之本
爲公塘予考開慶志始釋然有舒廣平墓在山中九曲詞未錄序中所
云兩湖亦名桃花坑此說悞有辨見後
句餘土音剡源九曲詩

六詔

四明談助

卷四十三

十四

右軍潑墨處一昔來金庭九曲自茲始六詔想風清右軍曾居金庭

故于六詔有宅

蹕駐

殿中良高節錢王更謙光荒祠雖蔓艸餘韻尚蒼茫殿中陳翊居剡

源二曲錢王俶駐蹕

兩湖

茫茫一溪水何以分兩湖桃花石壁眩經界已模糊相傳在桃花坑
是

白谿

白谿多烏柏榆林多青榆應憐戰場下舊是神仙居又稱戴林元

帥初居所

三石

五曲爲三石本堂居其中深山避北馬莫畏大隧風宋本堂于

兵山中

茅渚

殿中有初祖來誅茅渚茅乃生千蘭孫國香徧神臯剡源大

姓宅里

斑谿

斑谿水盈盈中有常春天聞道居人少吾將老此間有延靖

董聲仲所築以表其祖所植檜也

高輿

高輿更奇絕可惜歸禪關何不廬其廬共聽飛瀑泉

四明談助

卷四十三

十五

公塘

公塘乃盡頭晦水清且嘉本堂有龍駒別署太史家

王大令行遯剡溪

慈谿令王公玉藻字螺山楊州江都人崇禎癸未進士知浙

之慈谿縣子慈和良民不擾而事集未期年北都亡狗難翰

林檢討汪公偉前慈令也公率官吏士民哭臨畢謂哭崇禎也

爲位哭汪公三日已而故少詹項煜以從逆亡命來慈慈之

馮元颺與公皆出其門馮氏匿之夾田橋之別業公雖致之

餼然甚菲及慈之義民不容撲而淹之橋下公不問或以公

爲過公曰吾懼負前日大臨一哭耳聞者聳然乙酉夏大江

以南盡內附浙中百城守令或棄官去否則降而公與沈公

宸荃起兵募義勇請赴江上自効乃解縣事以兵科都給事中往軍前公任事邁往壯氣勃勃而江上諸帥惡之其在垣中雅持正議又不爲諸臣所喜乃力求罷莊太常元辰留之丙戌夏浙東再破公黃冠行遯于剡溪不肯歸久而資糧俱盡義民時時周之每臨流讀所作詩激厲慷慨仰天起舞辛卯以後始歸故鄉卒嗚呼明未吾鄉多賢吏而其後以死報國者九人前寧波府推官則儀部黃公端伯駕部林公之蕃知鄞縣則尚寶沈公猶龍侍郎張公伯鯨御史王公章知慈谿縣則巡道陳公瓚檢討汪公偉知奉化縣則給事胡公夢泰其以乙酉受鄞縣之命不久卽去卒死國者駕部王公之

棊卽王公章子

而公以首陽之節參之其耿耿之心未嘗于諸公

四明談助

卷四十三

十六

有愧也

結埼亭集外編

句餘土音擬薤露詞

何處埋吾骨

王侍御避人

昔年五家軍慈水亦其一同仇偕沈馮欲返扶桑蹕扶桑不可返沈馮泛溟渤淒涼故長官何處理吾骨怕聽人呼故長官長閉蓬門老布褐

沈馮謂宸荃京第

白巖山

石色如玉丹山圖詠云白巖瀑布如飛練今白巖未嘗有瀑布豈以其近雪竇而牽連之歟有宋張良臣墓四明山志又記唐天寶二年有金龍行雨之怪賜潭名永昌觀名大寶此在四明西北別一白巖山

剡源水從此出溪口繞奉邑後至大埠頭達大江張雪窻
良臣拱人也當時稱爲過江詩祖傳附見魏文節公碧溪
山房下

華頂山

縣西北三里山極高聳南與月没尖相望上有龍湫下有葉

仙師殿址曹志

三台卽北山

縣西北二里在華頂山東三峯並起如三台然又名北山上
有宋吳越康憲公錢億墓曹志

日嶺

縣西十五里上有石屹立八九丈狀若人形所謂新婦巖卽

四明談助

卷四十三

十七

此又名峯宋封爲夫人而祠之禱兩有應祠下有五磊峯曹志

嶺在銅山盡處立石十里外皆見嶺之西北皆平原有地濱
溪曰白作洋旱時地多赭獨是洋黍稻彌望數千頃蔚如利

于一鄉楊文懿集

鳳山

縣西六十步岡巒秀拔自華頂山透連東來形如翔鳳爲縣
治之來龍與印山相連故名下有含光亭曹志

印山

舊名高青亭山縣西三十步昔人作亭其上扁曰高青亭又
以山小而圓土多紅色故名印山曹志

奉化縣治

周爲越東南境地秦置鄞縣隸會稽郡山由赤董得名今縣城東五

十里有鄞城山下有鄞城縣卽鄞治也漢及吳晉宋齊梁陳

因之隋開皇中地并入句章縣唐高祖武德四年升句東爲

鄞州兼鄞句章鄞三縣地非秦置之鄞縣八年州廢爲鄞縣地并入于鄞隸越

州元宗開元二十六年始立明州以故鄞縣地爲奉化縣縣東

五里有山名奉化山四以名縣五代至宋皆無改建炎兵燬重建元至正十

三年又燬復建成宗元貞元年升州明太祖洪武二年復爲

縣闢門四東曰迎恩西曰順成南曰貞明北曰起鳳穴水門

于東西曹志治縣官制并賢令政績俱詳郡邑志

泉口村禦寇

禽孝鄉泉口村在縣城東北宋建炎三年金人寇明州破其

四明談助

卷四十三

十八

城諸縣悉遭焚燬義士李侑率鄉人任戢董之邵合義勇一
千一百八十四人戰于泉口招賢等路賊不敢進奉地獨全
勅授修武郎事詳郡邑志本傳其後人遷居郡社壇橋子元
白孫以稱父子甲榜同年有八葉進士已錄社南李氏下任
董二士並授修武郎任之孫曾若三傑三俊三恕謙董之子
孫若仁聲仁澤仁森俱登進士傳見成化志第六卷

鄉名禽孝故事

奉化董氏女未笄刺繡南窗二燕巢其上女日飯之編竹以
護其巢乳子羽翼成而去明年來女字之如初歷三歲燕去
女死又明年燕復來飛繞悲鳴不已父母告之曰女已死豕
在屋側俄而燕飛去三日不歸翁媪往視女墓側二燕伏而

死邑人异之故名其鄉曰禽孝

義馬殉主事附

應承完登張信榜進士授江西吉安之泰和令摧強振弱羣奸爲之斂跡民賴以安然承完質直口吃遇事未言而氣已塞民雖德之郡實忿其所行累爲構陷承完意不能悉白遂死焉郡聞之收其所乘馬以官價市之馬且行闖門數四卽返流涕如水執策者強之蹭蹬而出比至郡徘徊顧盼哀鳴不已竟死于水濱彼畜類之尚不負于人而人之受恩豈可不知所報耶故君子傳其事

成化志

青錦山

縣北一里自日嶺山來一名青錦巖一名蓮花巖嶄然突起

四明談助

卷四十三

十九

于學宮之後如屏然宋人于此山之下廟祀夫子景祐間邑令于房廢其旁石夫人廟廣爲學宮

曹志

寶化山

縣南三里又名玉几山爲縣治學宮之几案俗傳有樵夫入山滿目皆金寶欲拾之倏有神人仗劍而出頃之不見有寺寺有古松如臥龍杜鵑花如翔鳳

曹志

文筆山

俗名阮家尖山縣南十五里在玉几山南當學宮之前爲文

筆峯

曹志

奉化縣學

學故在縣東北唐開元中建夫子廟而未有學宋景祐間縣

令于房始立學宮治平初令裴士堯徙今址後屢圯屢修元至元間令丁濟創祝壽殿于聖殿西創養正堂爲小學王應麟作詩記其事又建二亭一曰參前一曰覺後太學博士陳著爲之記明宣德中令周銓遷明倫堂廣其規制又創東西二樓顏曰光風霽月魚躍鳶飛旁設二齋又于齋後增修號舍爲諸生藏修之所閩人陳山爲之記嘉靖八年令陳鎬重修先師廟剏聖謨閣敬一亭祠齋櫺星門外置田四畝鑿池引水環注泮宮王應鵬爲之記三十三年令蕭萬斛重建名宦鄉賢二祠及射圃亭修泮池改東西坊曰興賢曰登俊曹志歷朝規制暨賢學師品詣詳郡志邑

龍津書院

四明談助

卷四十三

二十

縣東四里宋乾道中朱文公奉使至此士人延留問道遂立書院後圯元達魯花赤等興復于寶化山之陽延任松鄉爲之師事詳文公書院碑記今廢曹志

舒文靖理學

舒文靖公璘字元質補入太學從陸象山遊得理學正傳舉乾道八年進士仕終宜州通判詳見二十二卷正學祠下同族津字通叟景定三年進士官太學博士著書甚富澣字平叟景定元年入太學講明正學寒暑弗懈一門經學人謂得于文靖之傳

忠節坊

在縣治南爲探花戴德彝立曹志

戴拾遺德彝字邦倫洪武二十七年進士第三人入翰林爲編修拾遺補闕直聲振于朝後遷監察御史益善其職建文初改左拾遺靖難兵起與齊泰黃子澄方孝儒輩日夕籌所以脩禦者燕王列朝臣數十人爲奸黨德彝與焉及京師陷遂死之隆慶中推官周光鎬特建祠于官山之陽

曹志

戴項氏焚譜全宗

烈婦項氏者儒士戴德祐之妻也建文時德祐兄德彝爲拾遺德禮爲部椽俱在京師德祐往省之值燕兵入都德彝抗節死德禮德祐亦被殺項氏知家必被禍謂其族人曰拾遺素剛直必死死則禍及宗若急焚戴氏譜各避匿吾爲若等明非吾宗也乃匿其二子外家未幾使者至索譜欲名捕之

四明談助

卷四十三

二十一

項曰拾遺親屬數十人皆居京師已死矣家居者獨妾宜坐使者不聽痛刑之身無完膚卒不肯承使者不得已罷其事還報成祖意亦解後遇赦匿者皆出而二子允珪允瑚皆撫訓成立僉謂戴氏宗復完皆項一人之力也

曹志

今德彝無後

而項氏所匿二子其後尙存族人亦衆祭酒載洵卽其族也

識小編

奇士應文煒

應文煒奉化人精史學年六十入太學早遊江淮吳毅甫作相其兄守建康元煒作書諷之其兄卽謝事去毅甫奇之招入相府不顧而去史嵩之罷相其姪景卿上書或云文煒教之嵩之諷所屬掠治文煒益忿卒不屈得免其言時事得失

多中宋亡時尚在爲遺民

結埼亭集

戴教授稱文章大家

戴表元字帥初咸淳中進士終臨安教授至元大德間東南以文章大家名者惟表元而已晚年集賢院以修撰博士二職薦老疾不起

任松鄉講學龍津

任士林字叔實其先由蜀綿竹徙居奉化爲文沉厚正大一以理爲主元達魯花赤等興復奉化龍津書院延任松鄉爲之師

附萬季野兩浙名賢錄

奉化

陳樞字子經號四明洪武中爲侍講學士著通鑑續編行世

四明談助

卷四十三

二十二

戴德彝字邦倫洪武甲戌以殿試第三人授侍講建文中改右拾遺靖難兵至抗節死

宋炎字廷珪永樂乙未進士仕至兵部右侍郎

應履平字錫祥洪武庚辰進士仕至貴州布政使所至有聲

王鈞字子宣嘉靖癸未進士仕至南京工部尚書謚恭簡

下詳自南而東諸山

天門山 結埼山

縣南六十里一名蜃樓門宋志作引頭門瀕海裡港兩峯對峙若天門然漢地理志鄞東南有天門水入海有越天門山陶宏景真誥云天門在鄞縣南寧海北半亞于海

曹志

結埼見

三十九卷

大洞山 名山

縣南六十里有石如屋下有龍湫名山一名霸王山內有龍

潭神祠雷鼓巖

曹志

梅山

縣南三十里宋志謂梅福曾遊此又云每大雷雨山下出小石如梅剖之有核故名其山兀立衆山中峯巒奇秀東爲登山有寺南爲鳴雁館西爲丁令威丹井泉僅一勺常隨海潮上下俗呼爲海眼

曹志

新嶺山

縣東二十里由舍輞嶺來山有七十二曲其嶺多生竹高僅四五寸葉皆白色寶慶志云嶺新開五六年狹而長有天

四明談助

卷四十三

然石磴上有石窪尊泉出甚冽杯飲止給一入行者以次取飲不竭嘉靖間更嶺道于後隴芟闢平坦行人便之謂之太

平嶺

曹志

獅子巖

在縣東五十里新嶺外狀如獅子蹲踞甚雄壯其下隔數百丈名半亭里爲南北通衢曹志其脉東行起金峩山入鄞界水兩分南達海北歸蕙江又一獅子巖有古樟木甚巨藤繞其上

在縣北一里金峨山已見三十九卷

黃溪渡 淡江渡

縣東南八十里俱通象山路

曹志

下詳奉西諸山

徐鳧巖

雪竇西十五里重巖峭壁瀑布數百仞下爲神龍所宅有鞠侯巖三大字刊于絕壁唐謝遺塵九題中鞠侯其一也其言徐鳧者相傳有仙人乘鳧上昇巖上有巨迹存焉四明志瀑布水源自躡躑嶺來見三十卷輕湍疊下隨在滂湃至徐鳧巖上通唐田路駕以洞橋狂奔赴如百萬軍怒爭一門雷撲之聲震動山谷臨崖股慄不敢窺視余有句云懸崖錯立水爭門萬馬奔騰虎豹蹲果是鞠侯形獨壯羣山下拜若兒孫巖下有立石嶺正對瀑布嶺南隔溪里許有栖霞坑

明沈嘉則觀徐鳧巖瀑布

清晨理遙策白晝臨穹岨嶽巖怖鬼膽鬱律相喧豕無風急飄雨潛壑奔晴雷詫目銀漢瀉心驚摧素麾涼雪朱明濺截冰墮寒威忘疲強臨瞰劇恐神理違戰欽慄股墜臨深誠堂垂幽貞神明持度與同心偕

前題汪長文詩

傾崖束峽雷霆鬪懸水魚龍起清晝驚風乍捲飛雨來青山石上無停埃窈窕靈源深不測一望明河萬山白輕如飛絲散如霧寒沫濛濛濕江樹人烟住比武陵溪片水桃花日來去

棲霞坑

坑上有栖霞嶺從奉邑董村達嵎縣唐田等處路坑內多應姓聚居兩巖崇竦饒竹木夾溪逼視曲突相錯其鎖處如鸛

昧然爲一村之門戶巖下溪水奔赴如雷巖上衆綠陰翳不見天日有巨石俯于溪邊可坐數十人行者必于此乘涼盥漱移時乃去出半里許溪迴路轉仰見徐鳧巖瀑布搖曳空中僅露其半蓋半爲立石嶺脚所掩也

立石幢

土人稱立石嶺以嶺上有石數仞如人立故名欲觀徐鳧巖瀑布必登此可全見首尾但陡峻錯齧且有緣崖線路恐失足無事寧莫登記丙子四月從仗錫返董村過此嶺路僅五里自未至西方下盡其險惡可知

御麥

種出西番舊名番麥以曾經進御故名御麥幹葉類稷花類

四明談助

卷四十三

二十五

稻穗其苞如拳而長其鬚如紅絨其粒如芡實花開于頂實

結于節

留青日札

俗呼六穀其實黃亦有斑者舊志皆失載

錢志六

穀隨處俱有而奉化徐鳧巖一帶特廣種勝于他處

大小晦山 雉嶺

相傳黃巢引亂兵過一山下天色將冥謂之小晦又過一山下天已深黑謂之大晦遂安營嶺上謂之住嶺按雪竇雖有巢跡亦是其逃死之日不應引兵而來若在轉寇浙東之時又不應違城郭而向窮山也道書云宋應則入此山覩其景色明麗再來則冥晦莫辨因以名之巖下有覆盆山丹山圖詠所云中有一山如覆盆林木交加華卉亂者是也有金井洞在住嶺之麓亦名茶坑峭壁飛泉舉隱潭齊勝洞外平石

廣可一畝山志明今所稱住嶺本名雉嶺從亭下進大小晦之路並無瀑布所稱飛泉之勝應別是一嶺在鳧巖之間宋高萬竹有大小晦山并度小晦嶺詩今依敬止錄俱採入第三卷高端叔傳下

桃花坑山

在二十里雲之南山巖壁立數仞延袤數百丈其石紅白相間掩映如桃花初發故名隱士竺汝舟居之與仗錫僧修己往來留偈云昔是神仙宅今爲長者居定須攀月桂宜教子孫書沈端憲誌其事元末孤峯德結庵于此語見四明山志

按大小晦山自雪竇西巖分出東行至桃花坑山山下名董

四明談助

卷四十三

二十六

村夾溪數百家多竺姓有竺氏新建宗祠山半隱士舊居宅尚存今奉爲總祠凡寧郡諸竺之先皆出此溪之上流合栖霞坑徐鳧巖諸水經大小晦山繞住嶺出亭下謂之前溪其後溪合隱潭千丈巖諸水與前溪會于亭下亭下者御碑亭之下也桃花坑山適在兩溪之間面前溪巖壁在半山高不過四五丈濶不過十餘丈巖下多竹紅白點不甚分明如志所稱亦地以人重也至云二十里過雲自應在山岡上今觀徐鳧巖至唐田畝一路俱可岡上往來南爲唐田北爲西巖中十餘里似過雲景象餘在山腰俱不類明德字孤峯見明極俊于雙林爲其所契有傳見四明山志伽藍桃花塢下

雪竇山

自麓至顛高可十里四山環合中有平田數百畝至者忘其
爲山也左右各出一水至西南山缺處合流而爲瀑布四明山志
上有雪竇寺西五里有奉慈寺山多奇勝名人題咏甚多曹志
山自躊躇嶺起三望山來綿延東行直至江口

宋樓攻媿雪竇山詩

城居久矣厭塵囂來訪名山寫鬱陶客路行隨流水遠征輿
坐與白雲高千林舞翠吹蓬鬢二麥搖青照紵袍努力共登
天尺五要看飛雪噴寒濤

野溪清淺渡危橋徑策枯藤上紫霄曉霧暗蒸山寺雨松風
深隱海門潮流杯水漲人何在洗鉢池清意已消又上荒亭
基上望雲山萬里更逍遙

四明談助

卷四十三

二十七

千丈巖瀑布 飛雪亭

其巖絕壁千仞故名千丈巖水至半壁有石突出隔之灑若
飛雪而後復爲瀑布亦名瀑布山宋眞宗勅曰東浙瀑布也
作飛雪亭于其上俯之以納奇觀曾子固有憑檻未窮千丈
勢之句則亭之來亦久矣其後亭廢嘉靖間郡守沈愷重建
置碑刻于其中未幾又廢遊人以殘碣投之巖下其聲激射
良久乃已于是碑刻柱礎亦盡四明山志亭下人曾以草索數羅
擔于巖上將索頭繫一石塊擲之巖下至地卽將草索摘斷
拋落巖下以手量之得六百四十仞折以古尺蓋已五百丈
矣嘉慶甲子十月巖上觀瀑方丈和尚雪堂爲余言

宋王半山千丈巖瀑布詩

拔地萬重清嶂立懸空千丈素流分共看玉女機絲掛映日
還成五色文

前題曾子固鞏

玉虬垂處雪濤翻四季雷聲六月寒憑檻未窮千丈勢請從
巖下舉頭看

前題樓攻媿次曾子固韻

驚見銀河空外翻奔湍千丈有餘寒下流不用長勞望祇向
懸巖頂上看

前題鄭安晚清之

圓嶠移來東海東梵王宮在最高峯試將法雨周沙界千丈
巖頭掛玉虹

四明談助

卷四十三

三十八

宋高萬竹雪竇寺并飛雪亭詩已附蔣山本傳後

胡乘龍倡亂伏誅

明崇禎十五年有賊胡乘龍者倡亂雪竇僞號天萌國改元
宗貞尅日分犯城中陸太守自嶽捕其內應六人誅之遂發
兵直抵賊巢獲其巨魁餘勿問當急變時募得疋贏民兵六
百人或曰兵期壯勇奚用是爲太守曰此饑饉餘生不急收
之祇助寇耳其深識如此

錢志

雪竇資聖寺

唐會昌元年立咸通八年重建賜名瀑布觀音院光啓中賊
裘南煬常通來自宣城領衆開山宋咸平二年改爲雪竇資
聖寺仁宗嘗夢至名山詔圖天下山川以進披覽于雪竇恍

與夢合特勅賚其寺僧淳祐四年理宗御書應夢名山四大字賜之寧波志云宋理宗嘗夢其處非也寺有歷代甲乙住持譜崇禎間司李黃端伯攜歸官署遊僧冒領以去相傳遂不可攷四明志唐光啓年間裘甫燬後重建明州刺史黃晟捨田二千三百畝以贍之元至元二十五年又燬所藏御書二部四十一卷無存越二年復建明崇禎末燬于兵燹今復興建曹志嘉慶甲子十月遊寺中雪堂和尚以銅印見示中刊信武軍監軍關防印旁有監國魯五年造六字余有句云信武軍營自此亡寺僧掘得舊銅章莫言佛地全無劫明季原來是戰場

宋眞宗勅命

四明談助

卷四十三

二十九

稽古太宗皇帝道優一貫學總九流精義入神豈專門之可擬衆流歸海非異味之能名先聖後聖其揆一也今檢會淳化以後御書賜至東浙瀑布寺仍賜祥符金寶牌住持師號命服歲度僧一員虔守州縣不許徭役以稱朕奉先之意大中祥符四年四月二日

宋仁宗勅命

朕荷祖宗之休丕承洪業未嘗不虛懷逸士仄席幽人雅聞天台之石橋近接四明之雪竇智覺之遺風尚存應眞之靈迹儼在慨想名山感形夢寐今遣內侍張履信賚沉香山子一座龍茶二百斤白金五百兩御服一襲表朕崇奉之意監司守臣特免徭役禁人樵採每歲誕辰許于東上閣門進功

德疏一道度僧一員以奉香火保國安民永我休命景祐四年十一月二十七日

下詳名人題詠

唐方元英干遊雪竇寺

登寺尋盤道人烟遠更微石窻秋見海山霧暮侵衣衆木隨
僧老高泉盡日飛誰能厭軒冕來此便忘機

絕頂空王宅香風滿薜蘿地高春色晚天近日光多流水隨
寒玉遙岑擁翠波前山有丹鳳雲外一聲過

有爲雪竇寺志者載此詩註其爵里曰元和狀元不知方
干唐末不第死後得賜一官以慰冥魂余戲爲一絕云元
英詩句不銷磨十舉終難占一科死後奏名何足慰不如

四明談助

卷四十三

三十

雪竇莽禪和

四明山志

明楊文懿守陳遊雪竇山

歷盡崎嶇數百盤豈知危頂却平寬芊芊秔秋常稔落落
松篁夏亦寒流出乳泉臨澗口化成飛雪下巖端花宮更在
層崖上月到金尊飲未闌

文懿公此詩一時和之者有金湜黃隆楊實張應麟鄭惟
廣汪綸馬鉦臧琚李諤王節范麟齊政王原明王晏孫勝
張邦奇周庶宋旭張應鰲僧福沂相傳以爲盛事選定附
之于左

四明山志

今節錄五詩

金湜

青山叠叠路盤盤下界何如上界寬澗草已隨春色老巖松

猶帶雪花寒得來方外遊三日忘却人間事萬端無數泉聲聽不厭更從高處一憑闌

上方高處卽天盤到此纔知宇宙寬萬壑泉聲隨地涌四山嵐氣逼人寒青雲學士詩偏老白髮禪僧行最端自笑遊蹤徧遐邇此心猶自未曾闌

黃隆

絕頂山形坦似盤凌風一望海天寬半空瀑布穿雲落萬壑松濤入座寒蓮幕芳樽開月下玉堂清興在毫端聞歌郢曲多新逸滿郡詩人和未闌

周庶

石登羊腸路幾盤乳峯高處境才寬四山香霧蒸人濕千丈
四明談助 卷四十三 三十一

飛泉沁骨寒仗錫僧歸明月下玉堂人醉碧雲端緣知諸老賡佳句撚斷霜髯夜欲闌

宋旭

名山西去路盤盤絕頂乾坤眼界寬古木栖雲晴亦雨乳泉飛雪夏猶寒清歌侑席聞天外佳句籠紗向壁端自恨無緣追後轍前村臥病興將闌

明屠襄惠瀟遊雪竇寺

宏治癸丑夏五月四日同韓文博 徐繼之紹先陳鳳儀
瑞遊雪竇秋官宋景暘有約不來節制判嚴敬遠攜酒至
因賦詩紀事

巍峩竇剝倚雲開此日登臨盡俊才雨散長空天有氣風生

萬壑地無埃吟遊分淺秋官去故舊情深節判來峭壁瀑泉
看不厭日斜還上妙高臺

繼楊文懿而倡和者以屠豕宰此集爲盛皆雪竇故事也

四明
山志

徐紹先

別樣乾坤天際開梵王宮殿聚賢才藤龕伏虎留遺跡石澗
盤龍絕點埃日午漸聞啼鳥暖雲晴放出好山來諸公賦罷
徘徊久翹首還瞻五鳳臺

孫勝

東風二月碧桃開穩坐篋輿訪辨才頭上有天開占畫眼前
無地着塵埃泉飛白練巖前去日駕紅輪海上來可是仙都

四明談助

卷四十三

三十三

移在此更于何處覓瑤臺

屠僑

叠叠高山面面開登臨又盡一時才上方樓閣低紅日下界
松杉撥翠埃白髮已悲人化去蒼天更假雨晴來碧紗有句
留遺事飛雪重重上古臺

至雪竇次太宰伯
父丹山公舊韻

李諭

瀑布泉香石洞開遠公風韻有遺才殘經欲理鉦敲月斷碣
閒看衲抵埃稔歲豐登甘露降就檐低宿白雲來一從憲節
題封後夜夜清霜落講臺

東門李暉雪竇詩

張亦姜豈羅謝漢倬冒雨約遊雪竇恨不同行三日後兼

行入山雲日相欺山花爛熳一路可人不覺至山門矣
萬壑千峯一徑深芒鞋布襪十年心先來遊屐風還雨遲我
山行晴半陰薄暮寒生雙澗水輕烟青鎖萬松林久聞雪竇
今才到欲與支那次第尋

到山知三子過東谷余卽訪尋聞余笑聲歡呼遙應

山房閒無人野徑踪三子聽鳥千百聲穿嵐一二里禪語出
雲間茆廬寄松底好友聚良辰春光供高士鋤筭烟生厨烹
茶香盈几高懷選茂林清談映碧水古朴自移情塵氛頓脫
體夕陽閒掛山東谷遊方始

午後登妙高臺烟日凝光峯巒積翠豁焉一笑心目俱爽
幽深上雲衢崔巍立天表四顧山青青幾處日皎皎寸心任
四明談助

卷四十三

三十三

逍遙雙目馳縹緲但知萬峯低不覺一身小和風拂人衣巖
花飛樹杪秋光更何如春意自然好

登臨興濃步履力弱各持杖徐行至上雪竇午飯已而後
進

濟勝慚無具風流許掾便我惟憑杖力身亦上山巔屈曲竇
中竇輕浮烟外烟累心都盡矣逸興自超然

短衣緩步探上中二隱潭水勢奔騰山容陡峭余附葛攀
藤高坐危石復沿溪一里許涓涓流泉噴下離壁崎嶇經
邱窈窕尋壑消憂寄傲樂而忘歸

足力無幾何漸落衆人後逶迤息山腰舒嘯臨溪口冷風四
面生清趣一時受臨深惕危機仰高對奇友歷險不辭勞尋

幽何得苟試擬大龍湫奔騰得似否動則鬼神驚靜則藏納
厚逝者如斯夫一悟同不朽

妙高退禪師前朝甲子孝廉先大父同年友也甲申之變
投老于此肅拜塔下悲慨橫生

兵氣滿地通公來咫尺家鄉竟不回杖鉢久齊生死路風塵
不上妙高臺西陵長抱胥潮恨東浙原多熹廟才分付句芒
無限量冬青只許墓前開

余僧似派禮妙峯老人塔

老人諱延賓張姓字客卿籍餘姚明甲子舉人甲申後卽
入妙高峯結茅隱居後受石奇和尚佛法名行恂號退安
年八十八示寂茲山派入泮于庚辰師正秉鐸鄞學凡五

四明談助

卷四十三

三十四

載而國變

妙峯尊者昔吾師璧水芹香入座時四十餘年揮塵日三千
諸弟及門誰別留凡杖家風遠獨照龕燈薪火移每憶高踪
睽絕後忍看素壁幾行詩

問誰築室待三年曾約同方未得前今日偶因塵外賞此心
實負箇中緣妙高枕畔松杉老瀑布聲中日月懸堪歎及門
桃李盡尚留余子也皤然

下詳歷代名僧

俱採四明山志

雪竇禪師常通

常通俗姓李邢州平恩人也年十三入鵲山求師二十于
本州開元寺具戒尋往京兆薦福寺聽習經律南來嗣法

于長沙岑文德初領徒至四明大順二年郡守黃晟請居雪竇天祐二年七月九日卒年七十二僧臘五十二塔于寺西南隅贊寧曰或謂通臨終言我龐勛也此非也按雪竇有黃巢墓周密癸辛雜識云張奎義爲西京留守識黃巢于羣僧中後住四明雪竇山卽雪竇禪師也且黃巢以中和四年七月壬午伏誅其于文德初四年耳通之領徒而至安知非巢之變姓名乎則所謂臨終自言者黃巢而非龐勛也贊寧誤記之耳不然常通旣爲龐勛又以誰氏禪師當黃巢耶與各傳記不合矣

智覺禪師延壽

字仲元餘姚王氏子總角之時持誦法華七行俱下投四

四明談助

卷四十三

三十五

明翠巖叅出家尋往天台天柱峯習定有鳥巢于衣襪謁國師一見而深契之密投元旨周廣順二年往往雪竇上堂雪竇這裡迅瀑千尋不停纖粟奇巖萬仞無立足處諸人向甚麼處進步僧問雪竇一徑如何履踐壽曰步步寒華結言言徹底冰偈曰孤猿叫落中巖月野客吟殘半夜燈此境此時誰得意白雲深處坐禪僧吳越忠懿王請開山靈隱新寺遷永明著宗鏡錄一百卷開寶八年十二月示寂賜號智覺

明覺上人重顯

字隱之俗姓李氏遂州人也益州普安院出家元瑩講圓覺疏于大慈寺顯往復送難瑩不能屈曰吾聞南方有得

諸佛清淨法眼者彼待子之求也久矣往詣石門聰居三載機緣不契轉叩智門祚之席遂得頓悟出世蘓州翠峯曾會守明州請住雪竇賈侍中奏加明覺之號在寺三十年一日遊山四顧周覽謂侍者曰何日復來門人乞遺偈顯曰平生惟患語之多矣皇祐四年六月十日示寂
宗上座韓大伯

韓大伯修苦行於大陽重顯時爲知客與客論趙州宗旨大伯侍其旁匿笑而去客退顯數之曰我偶與客語爾乃敢慢笑笑何事大伯曰笑知客智眼未正擇法不明顯曰豈有說乎對以偈曰一兔橫身當古路蒼鷹才見便生擒後來獵犬無靈性空向枯椿舊處尋顯陰异之結以爲友

四明談助

卷四十三

三十六

後顯住雪竇法席之盛號雲門中興顯嘗經行植杖衆衲環之忽問曰有問雲門樹凋葉落時如何曰體露金風雲門答遮僧耶爲解說耶有宗上座曰待老漢有悟處卽說顯熟視驚曰非韓大伯乎曰老漢瞥地也于是令搥鼓衆集顯曰大衆今日雪竇宗上座乃是昔年大陽韓大伯具大智見晦迹韜光欲得發揚宗風幸願特升此座遂升座一寺大驚

達觀上人曇穎

曇穎號達觀錢塘邱氏子嗣法谷隱聰梅堯臣有送住雪竇詩政和五年建亭于山麓以憇行人有遊上雪竇詩云下雪竇遊上雪竇過雲峯後望雲峯如趨仙府經三島似

入天門徹九重無日不飛丹洞鶴有時忽起隱潭龍只應
奉詔西歸去此境何由得再逢

藤龕老人知和

知和崑山張氏子從南岳辨遊叢林以爲飽參元符間住
雪竇之中峯栖雲兩菴山之前妙高臺前有石突出下臨無地

其旁古藤一枝和盤屈成龕嘗偃坐其中名曰藤龕獨處
二十年後徙仗錫山又遷二靈宣和七年四月十二日示
寂和住雪竇時常有二虎擾側元大德間栖菴毀虎爲人
患至元二年復建菴祀和其患頓息按妙高臺有伏虎洞
此虎在雪竇之證也四明山志和臨老有四偈已見三十九卷
二靈寺下

四明談助

卷四十三

三十七

圓通大師懷賢

字潛道初叅瑞新具知宗門承襲賓主之事最後見曇穎
聞所開示類皆世緣雜諦嘗以事斥一僧去每升堂輒追
罵不已賢心陋之乃詣方丈面數其過穎頷而不答賢因
此省悟始以信香嗣穎法歷住瑞竹龍遊圓通熙寧末明
州以雪竇請賢以疾辭請者三至不得已由海道行北轉
海門遇大風檣敗至慈之東岸舟破從者百餘人皆散走
賢獨安坐水中從者還救之乃免居雪竇一年謝去節度
使李端愿奏賜號圓通大師元豐五年九月示寂秦少游
狀其行

法藏守卓

守卓號法藏嗣圓照本法有偈云陽回幾次到新冬壞衲
寒爐也不窮白馬靜馳天外影紅顏偷過耳邊風是非未
起名何在物我兼亡境自空記取雲巖巖上語莫教孤負
主人翁

足菴智鑑

智鑒號足菴初至長蘆天童宗珏時爲首座一見指爲法
器習靜于象山之鄭行山海岸孤絕百色妖露鑑不爲動
深定中豁然開悟遂出求證于知識復過珏岳林得相印
可聞菴嗣宗主雪竇挽鑑同行荷負衆事會法堂新飭命
鑑普說宗歎曰吾生有耳未嘗聞也歷任棲真定水諸刹
淳熙十一年始主雪竇作錦鏡池以蓄飛雪上流爲一山

四明談助

卷四十三

三十八

奇觀紹熙十二年謝事止于寺之東菴三年八月示寂塋
于山左

石窻法恭

法恭號石窻奉化林氏子出家栖真院依天童覺得明大
旨歷主光孝能仁報恩彰聖瑞巖淳熙間范大參請住雪
竇前住者自得慧暉徙淨慈後慧暉歸自淨慈恭以雪竇
還之復居瑞巖八年八月示寂樓攻媿銘其塔爲人嚴冷
丞相魏公謂自得如深雲中片石石窻則空門之御史也
老牛智融

智融初名邢澄以醫入仕官至成和郎居臨安萬松嶺年
五十棄官謝妻子祝髮入靈隱出遊徑山匡廬聞雪竇之

勝遂投迹爲終焉計以善畫名尤好作牛出于范牛而妙處過之因自號老牛智融雪竇多蛇乃作二奇鬼于壁一吹火向空一蹋蛇而掣其尾蛇患遂除而時有火警或者病之又于火端作土梟梟聲爲之革嘗畫龍首半體禱旱輒應其適意時嚼蔗折草醮墨以作坡岸巖石尤爲古勁間作佛像不過數筆寂寥蕭散生意飛動樓攻媿嘗寄匹紙求畫融久不與攻媿以詩促之曰古人惜墨如惜金老融惜墨如惜命又曰人非求似韻自足物未忘形影猶映地蒸宿霧日未高雨帶寒烟山欲暝融始爲之作歲寒圖作詩不多語意清絕自言若得爲僧三十秋瞑目無言萬事休紹熙四年五月卒年八十計其五十棄官之日僧臘

四明談助

卷四十三

三十九

適符三十也

佛鑑大師師範

字無準姓雍氏蜀之梓潼人侍破菴先遊石筍菴有問胡孫捉不住乞方便法門先曰捉他作什麼風吹水面自然成文範在旁平生礙膺之物一時頓釋歷住清源焦山雪竇育王徑山賜號佛鑑理宗召見于修政殿淳祐九年示寂

野翁炳同

炳同字野翁

已見仗錫下

晚主雪竇以寄幻顏其室元大德六

年示寂

送僧之華頂見溪西詩高高峯頂屹雲中八十

溪翁也眼空相見莫言行脚事累他雙耳又添聾

下詳寺內外名勝

天開圖畫閣

在寺中方丈方丈有青石研德壽宮物也元黃縉銘曰匪琥其白匪璋其赤夫蒼蒼者天之正色也韞匱而藏守之以黑白毋曰茲宋之隕石也四明山志明宋琰詩天開圖畫渾然成獨愛軒中得此名何用丹青與金碧有聲自可寫無聲

妙高臺 藤龕

峯頂若臺截出萬山之表下臨無際東西約四十尺南北倍之相距爲丹小山平列如浮思西爲小晦公棠類寶龜靈廳容與于其側遠東望六詔羣峯魁壘若甃壺曲匏烟裊縷不斷闌楯之下笑語相聞而隔截在數十里外余弟晦木澤望

四明談助

卷四十三

四十

彈石空中食頃方聞翦然聲隆隆徧山谷蓋自臺及谷由谷傳籟遂倍其深耳樓攻媿詩一峯高出白雲端俯瞰天涯千萬山試向岡頭轉圓石不知何日到人間非虛語也前爲藤龕故址左爲伏虎洞皆因釋知和也右復有消凡臺深廣視妙高得其半 栖雲菴在妙高峯知和所住四明山志千丈巖之西爲妙高臺覓徑而上三面阻絕壁立千仞臨之目眩臺上有屋數楹門庭楚楚是爲栖雲菴習靜者居之遠望亭下諸處屋如螺殼溪若衣帶注視分明稍南爲高巖山剡源之第八曲也其外包以連山層巒疊嶂綿緜不絕山頂盡如鋸齒逐隊爭趨望東而去

宋鄭安晚清之詩

陸地芳洲擁翠翹巨雷穿石滾雲濤搏空蒼鳳欲飛舞奔海
玉龍爭怒號萬象橫陳坤軸富一亭平挹月輪高獨醒未覺
孤清境笑酌寒泉讀楚騷

明陸少石鈇詩

石徑入迂回亭臺出林杪遠岫迎歸雲層巒礙飛鳥崖崩樹
交撐壇寂花誰埽凌風一振衣清曠絕塵抱仰接烟霞重俯
視樓觀小安得鞭蒼虬倏然下蓬島

退禪師居妙峯

禪師餘姚人俗姓張名廷賓天啓甲子舉人初爲鄞學教諭
後遷楚令未之官慨然棄去入雪竇山爲沙門年八十餘卒
詳見二十三卷鄞學下

四明談助

卷四十三

四十一

妙峯集序

杲堂文鈔

今釋氏所稱雪竇道巖尊者本姚江張客卿先生也歲甲子
先生與先儀部同舉于鄉久之先生受署來教鄞學諸生鄞
諸生皆喜出先生門方是時國事大壞而江南溺于承平尚
謂收復可望先生獨慨然謂數十年人心喪失其禍遂流于
國家今朝野諸人急須痛自克省先復其本心然後共圖國
事不然恐神州陸沉事在旦夕因作復人心說一篇榜諸明
倫堂士大夫傳其語頗笑以爲迂然有識者讀之輒爲太息
時余年尙少已深識之未幾而其言大驗時先生已遷楚令
未之官先生慨然曰吾不可自喪其本心卽日入四明雪竇
山中逃爲沙門今釋氏所稱道巖尊者是也嗚呼若先生可

謂能自復其心者矣夫人生此心日有所用于爲子而能孝用于爲臣而能忠得盡其所事而自反其無欺此所謂能復其心也今者孑然此心既無所致而遠寄諸危巖斷壁飛湍奔溜之間而且毀其常形變其故服銷沉其生平姓氏而日與一杖一鉢一魚一燈同其寒暑日月斯已自放其心矣而獨謂之能復其心何也大易有言曰復其見天地之心乎夫復之爲時固五行潛運窮陰殺節之時也此時雖天高地涸萬木皆落萬水皆凝而獨有抱素反本葆其幾希者此心也先生能自復其心其在此時乎先生既有此心而後有先生之詩詩者心之聲也昔伯夷之西山伯夷所以寄此身者也登彼西山一章伯夷之心所發于聲者也雖先生已滅迹人

四明談助

卷四十三

四十二

外無復牢騷然而方寸湛然形于有韻讀先生之詩無不可見先生之心焉適先生自定其集命爲之序余恐讀者徒以先生爲釋門領袖致昧其本心因爲參述所識若此自今後人得妙峯一卷詩俱作先生復人心說斯可矣

含珠林

在寺墻之前當兩澗合流處圓阜若珠松杉蒼鬱或以爲卽黃巢之墓也然巢之來雪竇卽是常通其傳言塔于寺西南隅此非寺西南也且巢旣稱禪師亦必從釋氏之法而爲塔

矣

四明山志

宋舒嬾堂宣詩

何代神僧機匠深手栽珠樹作珠林
獰龍離穴頷初鑿老蚌

出泥光易尋海近蛟人工迸泣山深木客費愁吟開窻夜半不成寐明月時時照我心

錦鏡池

宋淳祐十七年僧智鑿鑿以滙兩澗之水者也其規如鏡張

雪窻以錦鏡名之成化初已湮爲田嘉靖間邑令錢璠修復

至隆慶復湮

四明山志

錦鏡池記

樓攻媿集

雪竇山名天下自下而升旣至絕頂其地始平曠四山又環之寺據正中氣象雄秀二水不知所從來出山之兩腋而會于前徑赴大壑峭石削立險不可測崩空落崖飛雪千丈洞心駭目勝絕一方此山之所以得名也紹興甲子郡太守尚

四明談助

卷四十三

四十三

書莫公將來游乃始發妙意于萬象之表謂水去太亟屬寺僧以田爲池使二流滙其中寬納而緩出之則寺當少利有詩云能廢千畦渟玉雪不妨飛練掛丹梯讀者躉之而四十餘年十易主人咸睥睨以爲難淳熙十一年足菴鑿公旣至百廢修舉取莫公之說斟酌之八月己未遂興畚鍤池深一尋縱四百三十尺廣半之築堤南面以便往來應橋爲閘視水漲落而閉縱焉明年三月庚子池成漪漣柏隄渟瑩如拭千巖倒景空助相映道俗交歎見未曾有禽魚上下皆有喜色師問名于雪窻張武子良臣武子曰是所謂淵林錦鏡者也遂以錦鏡名而請余記之余不能習陰陽家言然天地一氣耳山如人之定形水如人之脉絡或瀦或洩當適其中池

之未作也水若建瓴山之氣與之俱逝而不留及其既積則靈淑之氣得以扶輿磅礴于茲矣繼自今其必有卓然超徼之士深藏若虛出于此山以振祖風者豈惟少利而已哉曩嘗一再遊焉惟積雨暴漲則尤爲壯偉可觀顧安得每每如許及今過之既坐亭上徐徹二版水則大至怒濤迅雷凌駕震疊素蛻數萬哮吼層出眞天下之奇觀也莫公止謂不妨飛雪之勝不知此池之成乃大有功于瀑泉也

明樓得中詩

眼界空明絕點埃千花綉采類妝臺乍疑織女回文在還許姮娥照影來九疊屏風從地涌一奩寶鏡自天開道人況入心如水燕坐觀心悟劫灰

四明談助

卷四十三

四十四

青鎖亭 百步街

東西兩澗合流處駕樹于上作閣五六楹以憇行人蓋青山廻抱至此一缺爲寺之小水口舊名青鎖樓匾額爲魏王妃所書楊文懿公遊此亦稱之曰觀瀾閣稍南又有聽泉亭今圯山志青鎖亭旁上山有峻徑西折而南卽千丈巖可觀瀑布未至其處但聞殷殷隆隆響振林木既到則雷轟地動對面不聞人語俯臨絕崖兩足股慄不能諦視欲窮其勝必自御碑亭西有石磴號百步街者循而下至崖腰仰視之始盡其奇麗蓋泉出兩澗注峭壁若水晶簾自九霄垂下至半壁有石突出承之若盆泉激盆溢四出雪飄花舞復聚作匹練垂地乃蜿蜒作白龍循麓而去出亭下大溪百步街下盡右轉

數里卽下隱潭

入山亭

有入山亭在山之趾政和乙未曇顥所建

山四志

自溪口西行

循山麓迤邐數折始覩一亭榜曰雪竇山距縣治蓋五十里

矣過此以往漸行漸高步步引人入勝

宋僧鑒詩

荒蕪行盡處幽亭聊暫止帶雨策孤筇登高從此始

明宋琰詩

一亭西入梵王家百折千盤路轉賒山鳥似知來客意數聲啼上石榴花

寒碧亭

四明談助

卷四十三

四十五

自入山亭至此不數里有井在旁綠陰覆之昔楊文懿公遊山入此亭山僧獻茗爲名其亭曰寒碧今亭旁結小菴竹花楚楚門設小鋪賣餅餌遊人少憇茶點隨宜

望官曲

入山亭以上層巒疊嶂其勢曲突不一皆腰山而路下臨深涯有小山作支脚包護故雖有曲突皆險隘蒙蔚無可遠望至此得一大曲則必有一大突且其地甚高小山不能包護巒開林谿曠覽無際僧探官舫必于此乎望之故名望官曲遠眺下界溪流屈曲如蛇衆山散布若邱若垤極目蒼茫不啻在層霄上矣

御書亭

有御書亭宋理宗所書應夢名山四大字也如孫勝陸鈇所
詠俱誤爲德壽所夢殊失事實四明山志亭貯大碑刻應夢名山
四楷書餘字漶滅不可辨記丙寅冬三遊雪竇從此覓百步
階出亭下時曉霧未收俯視茫茫若海漲大小晦諸峰遠浮
霧上宛如帆檣出没波濤中董米畫手所不能到也余有句
云御碑亭側路縈盤俯視羣巒立霧端百里茫茫疑海漲出
山又得一奇觀石磴曲蟠三百級瀑泉直下一千尋層巖仰
視出天半昨日曾經屐齒臨

宋僧鑒御書亭詩

昭陵安寢夜飛夢到山邱往事難追復高亭絕勝遊

明樓得中詩

四明談助

卷四十三

四十六

誰向名山爲構亭夢中遊幸宋昭陵千年宸翰題金榜五夜
奎光映玉繩橫錫此時成獨往杖藜何日許同登蛟龍擁護
雲飛動還憶彤墀寵渥承

李濂

天王八駿志紫禁思名岳閱圖協朕夢染翰奎光落宮女吮
彩毫祠官訪丹壑雖非傳巖求差近華胥樂

張邦奇和

雪山本奇勝不減諸名岳迺僻海東隅千載成濩落帝夢昭
神靈宸章表邱壑雖非鈞天遊殊勝巫山樂

下詳寺外菴院

奉慈禪寺

咸通八年號奉國院宋治平二年始有上雪竇之稱四明山志
宋陳舜俞詩

一宿禪關萬慮空明朝更上十餘峯山依碧落不多遠人在
白雲無數重木末疎鐘驚虎兇門前瀦水穴蛟龍勞生正負
林泉約猶喜官閒此日逢

明孫勝詩

迢遞叩禪關來尋此日閒寺前重問寺山上更登山竹逕眠
黃犬松林掛白鷗朗吟天廣大日暮欲忘還

中峯菴 宴坐巖

菴在中巖智覺于此不寐稱爲宴坐巖有中峯夜坐詩見延壽條

下僧穎宴坐巖詩心危身亦危衽席尙顛墜如何巖石上來

四明談助 卷四十三

四十七

坐自安意能喻死生間無論寤與寐僧鑒雪竇雜詠云特立
羣峯表危然勢不傾禪心清似洗坐看月華明四明山志 栖雲菴
見前妙高峯下

乳峯菴

其山之最高者乳源所從出謂之乳峯菴當其下僧鑒詩云
厓竇乳堪啜凝眸翠作屏老禪初定起山鳥自呼名四明山志

雲外菴

曇穎之所栖也歐陽文忠未第時穎從之遊嘉祐四年遺書
別刁景純升座諭衆而逝四明山志

西麓菴

在雪竇之西坑宋陳著有詩山間築室占西坡小小規模淨

似磨兩壁鼓鐘來雪竇四圍松竹護雲窩軒窗有趣高僧遠
門戶無遮俗客多我寄前林時一到未知風月意如何其二
蹋徧山南紫陌間轉西尋麓更幽閒菊花數本竹邊路茅屋
幾間溪外山巧著軒窗隨上下賸留書畫在中間是菴信美
非吾土自有菟裘足往還 雪竇所屬此外更有華菴東翠
菴集福菴直罍菴四明山志桃花隴與雪竇隔一亭下大溪庵爲
孤峯明德所結已見前

三隱潭

其一出寺門西行十里而弱雙崖陡削澗水從中瀉注遊者
循石磴歷十餘盤下至澗底如入地穴而後仰見懸瀑是爲
上隱潭 其一從御書亭而南由百步街下至山麓循山西

四明談助

卷四十三

四十八

行山周遭如石城上有石筍離立高與山埒梅聖俞所詠之
石筍峯也經八九盤計里可二十乃抵潭潭廣半畝懸崖覆
之若厦屋瀑水從旁注潭中蜿蜒如白虹是爲下隱潭其中
隱潭卽在下潭之上四明山志

上下二潭所入路并景象誠如山志語其中潭至下潭路不
能達記甲子十月約伴遊隱潭從龍王堂後而入兩崖相對
逼視瀑泉從堂左斗落如雷聲而不見堂右隙路不容趾徑
以敝衣坐地隨勢曲折溜下約里許始見懸瀑注潭離奇參
錯無可擬必欲擬諸如牙虫剝蝕齧齧豁露蠡孔鑿鑿七上
八落仰視一線天光不見雲日笑謔移時循崕而下復里許
始至中潭遊人惟潦盡時可至否則飛沫濺衣無竚處其險

怪想龍王深自秘藏非若干丈徐鳧二巖之雄壯顯豁也

宋僧穎三層瀑詩

山頭出飛瀑落落鳴寒玉再落至山腰三落至山足欲引煮
春山僧房架剗竹

明呂中甫時隱潭詩

不歷隱潭水那知上寺尊萬蓮盤法界雙樹繞天門禱雨龍
潛鉢談經虎在軒老僧忘世久相對自無言

沈嘉則四明山遊記

摘錄遊雪竇段

明日辭仗錫南出高下壇曼阻

陪陂陀不知幾百折乃踰踟嶺童蛄半至徐鳧巖一曰徐
無巖陡下千尺瀑垂半壁忽內陷陷窮復突削廉故瀑濺作
烟霞狀飛灑殊態若白日走怒雷三面壁匣句廉側窺而頭

四明談助

卷四十三

四十九

目眩煜竦讐神悸矣強起策而臨廁風倒激珠雨射霏霏濕
人衣帽思從陜中仰視四山環阻谷口南入三十里回遠矣
躊躇而去去十里復得一隱潭瀑三面亦壁匣小較徐鳧四
之一級石而下仰視殊快心目云下復有二潭潭俱龍伏稱
靈焉陜中石齧人足不能去去又十里爲雪竇未五甲有上
雪不及遊雪竇山曠然四豁紆紆城也闕其南闕外青峯屹
起若芙蓉撲翠是爲小晦山寺曰資聖殿毀今存者不甚飾
亦不甚宏敞一浮屠立殿右云爲雷火所燒山門高四丈許
新立十六夜爲風壞僧云龍怪也寺前田寬二百畝有含珠
林今赤地有錦鏡池今田有古松一如馬遠畫視仗錫尤大
大可三四圍松下橫石梁兩澗夾左礪出梁下合而南流爲

瀑布瀉千丈巖稍不到巖十丈許橋而屋者十楹余題曰瀑
上橋千丈巖瀑亦同徐鳧巖而半石忽作盤仰承瀑瀑至盤
碎擊而玉屑飛聲吼空谷不雨而雷日光蕩射恍恍電上有
飛雪亭瞰崖之阻故太守雲間沈公作遊記作詩碑焉風厲
不可亭亭碑亦仆由亭西上爲妙高峯臺如峯名今燬有平
敞地昔僧院云曾有道術虎伏就食嘗結藤龕栖其中峯石
隆然平者三盡處壁削奇峭望之巖巖也四面諸山嶽崦險
塞交錯如繡時陰晴互異色幻變誠妙且高矣南望爲大小
晦小晦近丹崖青壁信當界之仙都記有寺爲奉慈坑爲桃
花俱不及尋從妙高還由瀑上而東兩山坳中有亭碑宋理
宗應夢名山御書入寺路由此由山南轉下白泥岡下口中

四明談助

卷四十三

五十

臥對瀑布勝益奇視隱潭宏而肆哉潭受瀑黝然沉沉廣可
畝餘水湄芙蓉叢生又云生雷公藤白泥岡土獨堊餘土丹
兩僧日侍遊一戴姓一陳姓俱鄞人明日辭雪竇出

句章公遊徐鳧

時立石嶺尚未開故云思從谷口南入仰視三十里回遠矣

過雲木冰

四明山志于隱潭下云有嶺曰二十里雲唐謝遺塵所謂過
雲山中有雲不絕者二十里是也其實過雲不在是處有辨
見前桃花坑下茲附木冰記于後

南雷文定過雲木冰記

節

歲在壬午余與晦木澤望入四明自雪竇返至過雲秀靄渙
濁蒸滿山谷雲亂不飛瀑危弗落遐路杳然夜行撒燭霧露

沾衣嵐寒折骨相視禿氣吁嗟咽續忽爾冥霽地表雲斂天
末萬物改觀浩然目奪小草珠圓長條玉潔瓏鬆插于幽篁
纓絡纏于蘿闕琤琮俯仰金奏石搏雖一葉一莖之微亦莫
不冰纏而霧結余眙睥而歎曰此非所謂木冰乎春秋書之
五行志之奈何當吾世而有此异也言未卒有居僧笑于旁
曰是奚足異山中苦寒纔入冬月風起雲落卽凍冷飄山以
故霜雪常積也蓋其地當萬山之中囂塵沸響扁鐻人間邨
烟佛照無殊陰火之潛故爲愆陽之所不入去平原一萬八
千丈剛風疾輪侵鑠心骨南箕侈口飛廉弭節土囊大隧所
在而是其氣皆斂而不揚故恒寒而無燠余乃喟然曰嗟乎
同一寒暑有不聽命于造化之地同一過忒有無關係于吉

四明談助

卷四十三

五十一

凶之占居其間者亦豈無凌峯掘藥高言畸行無與于人世
治亂之數者乎余方齟齬世度將過而問之

翰林松

澗邊有古松高令欲伐之戴洵乞免因號爲翰林松洵詩云
翦伐先曾乞縣公至今人號翰林松野猿知道非封爵猶抱
寒條候晚鐘又八景銷沉絕舊踪百年只得一株松也知不
是無情物翠色而今作意濃

四明山志

愚齋戴公始爲孝廉居破屋下忽颺風墮瓦破釜粥熟不得
食元配竺安人詬曰誰破吾家而令吾若是公笑曰風亦御
史所爲耶竺安人乃忻然各枵腹就寢公曰得無餒乎安人
云想君家安道先生此事時有何必不愈于廣陵今正當補

傳中此節耳相與一笑閬戶焉

識小編

公名洵字汝誠嘉靖間

進士由翰林轉南祭酒以忤時相張江陵遂致仕歸絕意仕
進

爛平山

宋耕號雪溪世家雙流遷崇慶紹興中爲閬中令忽棄官而
去有傳其在四明山者其孫德之尋之至雪竇遇蜀僧云此
山之後爲爛平山有二居士其一宋宣教也德之攀援而上
但見丹灶藥臼而已樓宣獻鑰爲賦騷詞云君之生兮天之
西望雲山兮名之雪溪君之遊兮海之湄隱于雪竇兮杳然
何歸子從其父兮孫訪其祖子之不遂兮孫之心良苦嗟嗟
閬中君兮棄家而遠逝蹇胡爲兮不之留其遂蟬蛻塵埃而

四明談助

卷四十三

五十二

仙耶其亦肥遯得道不死而隱于四窻之幽耶捫藤蘿以尋
于爛平兮旣不可見莽白雲之廿里兮欲進兮焉求青櫺兮
實繁莎蘿兮花稠鞠侯兮相與羣白鶴兮嘯其儔謂爲遠兮
何景物之良是謂在邇兮將路逕之何由肖君像兮茲堂奉
烝嘗兮良疇君之來兮庶幾其見之君之不來兮徒徜徉以
夷猶

溪口

雪竇後爲爛平山雪竇前出寒碧亭過十里平路至溪口溪
口爲奉邑一大鎮百貨俱集遠近居民數千家左爲鵝鳩山
清修嶺入鄞界右卽公塘爲剡源第九曲出口

畸山

縣東三十里曹志崎山爲溪口鎮關鎖突出溪中溪面甚濶編

柴作橋廿四洞居民皆業陶凡浙東缸罈餅壘多從此山

下詳自北而東諸山

塔亭山

縣北二里布袋和尚葬此故名上有鉢盂佛跡山前有小山
名封山舊志渾而爲一誤曹志

岳林禪寺

縣東北三里梁大同二年始創菴溪西名崇福院後徙置溪
東宋大中祥符間重建改名岳林乃布袋和尚流寓道場明
時屢火旋復曹志

布袋和尚

四明談助

卷四十三

五十三

名契此常以杖荷一布袋凡供身之具悉貯袋中入布見
物則乞時號長汀子雪中體不濡示人禍福輒應一日以
蒿草散植民田中未幾錢氏增丁稅民亡田荒梁貞明三
年丙子三月于岳林寺東廊石上端坐而逝岳林遂爲布
袋道場後有二僧至寺云從天台見之衆僧發塚視乃空
龕也莆田縣令王仁侂成化志先遇于江南天興寺後以
福州官舍復見之懷中出一圓封授王曰七日不至則開
踰期發之乃偈也曰彌勒眞彌勒化身千百億時時示世
人世人俱不識不得狀吾相止此是眞缺字一王令記其事
併刻其偈于碑崇寧中賜號定應大師曹志

金鐘山

縣北十里山形似鐘故名有金鐘墩龍祠曹志在孝感山北其下卽長汀

金鐘潭

縣東十里傍有一墩或傳錢氏嘗載金鐘過此沉焉漲沙成墩鐘今在墩之下歷久不爲水所盪成化志

孝感山

縣北十里自銅山來相傳昔人喪父廬墓側哀毀骨立天忽降甘露艸木花皆白故名曹志

銅山

由日嶺出其山甚尊周廻三十里曹志

漢城山

四明談助

卷四十三

五十四

縣東北二十里自銅山來山頂平曠可容數千人無荆棘叢木有保壘之狀斫土者或得古兵器俗傳漢王避兵之處非也蓋五季間鄉民屯聚以相保衛故有此名與霸王山相對山有擂鼓巖蓋正與此相雄長耳有漢城廟曹志霸王山已見前

篠楸山

縣東十五里曹志聞銅山之脉度長短嶺歷諸小山起篠楸山下似扇屏鉅門體度壩橋江起毬山茅山已見四十二卷連山在銅山之南水出鴉鵲衙橋至棟樹磳落裡江再行至烏邱合坊橋水出銅盆浦俱未審其實

四明談助卷四十四

東四明外護奉化已錄于上象山之脉未起四明山先自台州寧海縣分出經台明嶼石門嶺橫山蒙頂山第一尖溪水至王壇落江通錢倉爵溪出東大洋象山之南有健跳桃渚二所水經石浦昌國衛南田出大洋兩水夾出脉自蒙頂發開歷青龍五雷大雷煉丹等山起象邑主山後有鄭行山左右有梅溪鳳躍獅子等山自西北而東有姜嶼山珠山屏風山錢倉爵溪二所自西南而東有清潭五師靈巖三萼后門東門等山昌國石浦二所東南海外有南田韭山大薤普陀桃花朱家尖大小洛伽等山至蓮花洋四明水道總界沈家門止凡里第人物不及詳所有古蹟事物詩歌統列于後

四明談助

卷四十四

一

台明嶼

縣西南一百五十里兩山相對一台山一明山此二郡分界之處上產金荳

成化志

石門嶺 界嶺

俱縣西北六十里寧海分界

曹志

橫山

縣西北五十五里橫于台明之界故名

曹志

蒙頂山

縣西四十五里上有巖曰花氣巖夏旱少有雲氣必雨

成化志

花氣巖絕頂名天峯乃天台分脉盤鬱聳拔爲邑山之祖其

中平衍有田可耕稼

曹志

淡港溪

縣西四十里源出蒙頂山至淡港入海有渡可通奉化古陳

山渡在下流

曹志

青龍山

縣西五十里層峯峭壁捫蘿而登有東攝潭瀑布落其中旱禱得鶴龜必雨鶴龜甲長尺許宋熙寧間五雷山謝公寶徙居山右宣和間大旱令江翊拜禱潭下青龍現形雨卽滂沛因名又有紫雲潭烏巖與大雷山兩峯對峙飛瀑湍流不涸巨石中有一洞深不可測舊傳與東攝潭通

曹志

五雷山

縣西北四十里有五峯相疊而下謝仙所生故址

曹志

四明談助

卷四十四

二

北港

東達洋西距鮎埼由陳山渡一潮至方門再潮至烏埼三潮

至府城下

曹志

大雷山

其山高大盤據數十里在縣西二十里外烏巖白巖在其西又有下沙山自白巖東過蝦蟇嘴可入于海

曹志

大雷山上有石壁高十丈許飛瀑瀉于潭中深不可測與永明寺前清潭相通亦見曹志

黃溪渡

縣西北十里爲郡城往來必經之路過渡卽達奉之十廟磬國朝康熙三十五年象協副將張進重築石埠并十廟磬胡

令祚遠成之雍正三年邑令馬受曾始令渡船舵工水手完
脩改埠于墻下潭行者無苦曹志黃溪之源出鄭行山

智門寺

自白巖西過數步爲萬松山其麓有智門寺舊名保安院周
顯德四年僧從祐建治平初改今額明洪武二十四年立爲

叢林曹志

煉丹山

縣治西一里又名蓬萊山隱映圓秀其嶺平夷亦有丹灶及
應真亭址相傳陶隱居嘗煉丹于此更有一峯名大煉丹海
上望之層巒疊嶂如畫圖然成化志山上有仙掌巖山半有石

屋可布牀几明萬歷初老僧大光從屋後沙泥中搜出片石

四明談助

卷四十四

三

有大光道場四字衆以爲奇屋之背禪室五間倪令甫英造
吳令學周復建閣翼以亭榭稱勝地云西麓有蓑衣巖巖壁
篆書數行不可識疑异人筆也曹志

棲霞觀

縣治西南二百五十步蓬萊山下舊名蓬萊觀始因秦徐福
梁陶宏景皆隱跡于此而建隋大業元年廢唐天寶十二年
台州刺史袁仲宣復建宋治平二年改今額淳熙末遷于象
山之西嘉定十三年進士張大原于舊址重建後圯明洪武
元年道士王虛璧重建成化志

象山

象山在縣北半里爲縣主山形如伏象縣治築作龜形所以

取象見龜則止之意也山腰舊有水曰象潭頂曰圓峯又曰
圓峯山志成峯頂舊有望海樓山之半南有觀瀾亭北有白
鹿飲泉亭俗傳白鹿飲泉于此卽之不可得後人創亭今廢

曹志

象山縣治

象環邑皆山而治奠于象山之麓周爲越東南境地漢爲治
縣封內地與鄞聯界鄞今奉化建武初改治縣曰章安吳太平二
年析章安爲臨海晉太康元年析臨海置寧海縣隋開皇九
年并寧海入臨海唐武德四年升臨海爲海州復析立寧海
縣五年改海州爲台州六年復省寧海入章安永昌初復置
寧海縣神龍二年析寧海置象山縣御史崔皎奏以象山之
東麓彭姥村立縣治此

四明談助

卷四十四

四

建縣之始代宗廣德二年始從台來屬此象山隸郡之始歷五代宋元明
迄今無改闢門四東賓暘南來薰西迎恩北拱極水門三北
一南二曹志治縣官制并賢令政績俱詳郡邑志象山縣在金
峩之南中隔黃溪渡小海金峩爲府治案山象山縣爲府治
作蓋有象協署在南城之右

東澄河 西澄河

在縣治左右二河之源俱出象山舊以縣治址作龜形以止
象故浚二河瀦水以養龜又于治作八卦墩二流會於墩下
從九曲溝南入於玉帶溪東流經儒學櫺星門下高阜磳至
史家浹入於大河今二河爲附近居民填塞後當開浚復舊

曹志

望稔樓 竹籬茅舍

望稔樓宣詔樓勅書樓俱譙樓左右宋令趙善晉建桃源徑竹籬茅舍月臺俱縣治西趙善晉建

曹志

象山縣學

學故在縣東北一百步建自唐會昌六年宋嘉祐中令顧方修治平中令林旦重修建炎兵燬隆興元年令胡琦創造嘉定十一年令趙善晉重修大成殿校書郎張慮有記咸淳四年令陳復明重建明倫堂左右序先賢祠明年復建大成殿并四齋兩廡咸新之朝清大夫黃蛻爲之記自元至明屢修屢圯成化間令凌傳以舊制湫隘因東隣袁岳應儀捐地擴而大之嘉靖二十九年令毛德京大修教諭楊繼宗捐俸荆禮

四明談助

卷四十四

五

門闢泮池跨以橋邑人應雲鸞爲之記萬歷二十三年令周官偕諸生捐俸買市樓并基撤爲空地前建三橋

曹志

歷朝規制暨賢學師品詣詳郡邑志

元鄭覺民送王叔載教諭象山詩

蓋壤邈今古羲娥明且夜動靜既有殊顯晦亦相謝奚爲至多物好惡迷取舍離方乃遯圓取密或遺罅安得天下士定論萬物價

五首
之一

象山海中居象泉何冽清泉以鑿妍醜山以見虧盈相望五十年羔雁各逢迎送別固有禮怡悅亦多情春深照花溪爛

爛雪物晴

五首
之五

句餘土音賦林大令西谷

天門山高臨蓬瀛此爲天東天盡設長扃所惜僻在一隅游
客所不經風流林大令惠政與海清汲井忽逢井中銘開徑
還添徑外亭自西而北觀洪瀾豈獨小憇堪濯纓誰其賦者
許右丞爾時沿海正承平况有賢司牧雅琴日夜鳴一自崎
頭飛矢谷神驚七百年業日以傾可憐俗吏莫我聽

林大令旦字士明治平元年任象邑令通海西港版築縣
城恢學宮縣治多創從前所未有政成別治西谷因茂林
修竹建亭臺以時登眺吟詠尋遷監察御史劾李定謫歸
俞推官忠烈

俞述祖字紹芳歷沔陽路惟官至正十二年河南亂兵反湖
廣行省長史上下望風奔潰述祖愾然收募義兵槌牛享士與

四明談助

卷四十四

六

敵遇于綠水相持十餘日力盡無援爲敵所執敵欲降之縛
其五歲兒曰不降將殺是卽厲聲曰我躬不閱遑恤我後何
不速殺是敵人竟殺之慢罵不已遂至支解逮死罵不絕口
五湖提領季原童狀其事于朝明年克復沔陽監察御史完
者帖木兒金剛奴等奏乞褒贈存卹上憫之贈典優渥詔祠
于沔陽

成化志

蔣助教兄弟講學

蔣景高字伯尚刻意問學與弟景武築室山中朝夕講論凡
經史歷數之學無不注意爲詩文得古作者之趣洪武初荐
授國子助教日擁臯比訓以正學一時生徒咸底于成晚年
自號丹臺外史景武精于藝文而尤長于詩

成化志

蔣王二士合謀殺賊

蔣公直勇智出倫居家孝友無間言洪武初元蘭秀山賊據縣治衆莫能禦公直謀于縣尹孔立率衆伏寶梵寺用計勦捕賊首招徠其脅從邑賴以安事聞擢知陽朔縣

王剛甫倜儻負氣節攝東門巡檢蘭秀山賊反襲縣縛令丞入海剛甫與友蔣公直謀募衆掩擊殺其渠魁釋其脅從者若干人議者謂是舉力出公直謀賴剛甫俱曹志

萬季野兩浙名賢錄象邑二人

錢唐字惟明洪武初由布衣召爲刑部尚書同鄞縣程徐諫孔子祀典野史言太祖欲廢孟子配享唐抗疏諫袒胸受箭語不可信

四明談助

卷四十四

七

俞士吉字用貞洪武二十九年舉人仕至僉都御史所至有聲

鄭行山

縣北十里爲象山後擁形勢聳拔產靈芝佳茗昔鄭行結菴修道于此東聯瑞雲山逶迤起伏如雲曹志

梅溪山 圓嶠亭

縣東二里許爲象邑青龍爲其低小乃建文峯塔于其巔後毀今復建上有王字山山頂平夷如王字因名縣東四里巖壁有東谷二字世傳羅隱經此而書又有圓嶠亭在東谷桃花溪之西四山盤旋前揖松蘿下俯石澗宋嘉定十二年令趙善晉建又東有鼓吹山天將雨巖壁空洞有聲如鼓吹曹志

梅溪河

縣東五里源出王字山流八東大河一派入姚家河縣東三里有錦溪源出象潭王家畧二水合流入東大河百丈岸入

海曹志

鳳躍山

卽象山之聯峯唐乾符二年有鳳翔于上故名曹志

鳳躍溪

縣西北一里源出鳳躍山合玉帶溪流至永安橋自西而東經儒學前入長樂橋環繞縣市又名天溪曹志

方壺山

縣西北一里鳳躍泉之南林木陰翳巖岬卓峭僅容一亭趙

四明談助

卷四十四

八

善簪置曹志

等慈禪寺

縣西一里舊名鳳躍宋元嘉初僧鳳躍建治平初改今額明洪武二十四年立成叢林成化志嘉靖四年重建曹志

潘頭陀年二十好屠宰一日悔悟棄家入天台浪游湖海得道而歸居等慈寺說法從者甚衆一日縱步出門有一老嫗浣衣溪上見頭陀來諦視良久乃曰此非昔日潘屠耶潘俯首作偈曰人說歸家好歸家心不寧溪邊老婆子猶說舊時名乃負父母棺歸山中合掌誦經忽火起與之同化後數年有人見頭陀于他方者曹志頭陀明末人

獅子山

縣西南半里以形名又十里有玉峯山峯巒層疊秀出如筆
又環翠山林木森茂蒼翠環繞

曹志

玉几山

縣南一十五里縣治案山兩角起峯如案

曹志

海眼

縣南白霍廟前水田中廣丈餘中皆淤泥探之無底而有澄
水久旱不枯俗傳有大樟木自海浮至由海眼而出遂植于
廟前康熙二十九年六月爲颶風所拔

曹志

雙蓮池

縣南八里長濶三畝有並蒂蓮生焉故名

曹志

紅木犀花

四明談助

卷四十四

九

花之品有紅木犀最奇號爲丹桂邑士史本初得此種因接
本獻闕下宋嘗遣使求之移植禁中高宗帝雅愛之紹興間
曾畫爲扇面御製詩題其上以賜從臣榮蕤自是四方爭求
之歲接數百本史氏以此昌其家今惟邑境所植色深而香
烈移之四方則色香少損此地氣使然也

寶慶志

詩見下

高宗御製詩

月宮移就日宮栽引得輕紅入面來好向烟霄承雨露丹心
一一爲君開

復古殿又題

秋入幽巖桂影團香深粟粟照林丹應隨王母瑤池曉染得
朝霞下廣寒

制使胡榘紅木犀花詩

碎瓊揉香作肌骨
霽白昕紅染膚色
人間何處有此葩
一種風流初未識
東隅月戶編三千
夜修玉闕瀛洲前
拂搖桂子偶墜此
雨露培植開韶妍
史翁移根出葱蒨
雕斛持歸翠微殿
一朝麗質冠百昌
御墨分題落團扇
何年流轉江南鄉
一木奚翅千金償
分枝接葉色已淺
縱有此花無此香
絕愛西山佳麗地
藹藹修林倚清吹
寧論斜日杏花酣
未許熙春海棠睡
是時金氣初高明
宇宙軒谿澄埃氛
青霞絳雪互點綴
濃芬賸馥飄氤氳
驚峯繁黃今不數
破滅山僧練裙女
試看香御擁紅雲
肅奉虛皇游碧宇
攜持寶鏡吹波金
寒光萬頃空人心
煩君控取紅鸞住
便恐香魂夜飛去

四明談助

卷四十四

十

忠定史越王浩次韻

粟蕊搏金葉凝碧
獨在秋林逞顏色
豈知東溟史氏居
別有奇標人不識
姮娥侍女盈萬千
一一姿貌皆無前
爲嫌此花忒淡薄
渥丹乞與春爭妍
露滋胭脂霜染蒨
植根只向廣寒殿
凡塵俗韻不可干
清涼惟許秋風扇
何幸移到蓬萊鄉
鉅萬索值誰敢償
盤紆闌干久不耀
一日名飛並國香
豪貴爭看期縮地
載酒遲來煩鼓吹
園丁聞之競采擷
夜深不使花神睡
接枝換骨離四明
飄飄爽氣排妖氛
遂令禁籞成真賞
餘馨賸馥常氤氳
芙蓉寒菊不足數
包羞正似無鹽女
從渠搖落動秋聲
獨步惟茲徧寰宇
我嘗對此傾葵金
却思四海狀元心
殷勤勸花宜且住
寒士人人折得去

胡制使再次韻

露隱森森小山碧不嫁春風矜國色流芳端自蕊珠仙曾是
先皇親拔識一身便足當三千氣韻乃在黃香前聊同蕖菊
領秋色不與桃李爭春妍日幄雲幢護青葢丹霞爲臺月爲
殿露滋韶艷染猩袍風引清芬吹雉扇結根只合帝子鄉價
重未可瓊瑤償濟以小試舟楫利作醴更助椒蘭香仙籍英
聲在丹地紫殿名高非濫吹影斜遙漢玉蟾寒香度鎖窻金
鴨睡運際千齡遭聖明氣使萬里開塵氛一枝昔已擅風采
五方今正傳氤氳後塵江梅誰比數獨抱孤根對青女幸分
餘馥沾後來一吐寒花照霜宇佇看一諾輕千金嫣然顧笑
舒丹心願公千秋長在廣寒宮裡住容我驂鸞共來去

四明談助

卷四十四

十一

史越王再次韻

鄮峯老子雙瞳碧已悟人間空是色羣芳四季作芳菲一笑
觀之如不識有時斗酒沾十千狂歌爛醉羣花前紅紅白白
自妖艷誰曾着口論媿妍惟聞丹桂藏青葢清芬正滿姮娥
殿却思一見無緣由但爲奇標在團扇忽朝移本下吾鄉此
願端知合得償園工玉斧與換骨坐使凡種皆天香先皇得
之植禁地飫賞鈞天動仙吹高燒鳳蠟類星繁正恐夜深花
欲睡于今哀戚徧幽明鼎湖山駕超塵氛遺髯注想文王圃
玉蘭佳氣徒氤氳胡君眞材一二數他日補天慕媧女正欲
攀枝效郅詵會看聲名飛海宇雄篇擲地如鏘金俊逸清新
洗我心怪底斯人掉頭不肯住明年射策君門去

句餘土音賦四明土物紅木樺詩

天門紅木樺遠與凡種別曾登玉皇家御筵傳神筆奎芒返

化工國香還月窟空餘誠齋詩定水蒸烟冽誠齋有謝定水僧送蒸木樺詩

絕句
四首

象山產麒麟

明萬曆三十年正月十三日象山民家產一犢如麒麟鱗甲

皆具皆有蓮花形主人駭為不祥擊死五月縣城中忽有異

人胸背各懸一鏡手執紅棍背負紅袱兒童爭視之遂化青

烟而去曹志

神斃三虎

三十五年象山多虎日未晡即出噬人象令吳學周為文禱

四明談助

卷四十四

十二

于城隍次日有三虎一時俱斃曹志

下詳外護自西而北而東諸山

姜嶼山 烏嶼山

縣西北五十里由此越海登陸則為奉化境再十里海港中

有白石山奉象分境于此烏嶼山縣西北八十里山形如拳

孤懸海中亦奉象分境處曹志

珠山 金蛤潭

縣東北三十里山頂一石圓聳如珠海上望之時現寶氣因

名巖上有古檜奇怪又有潭晴雨皆溷旱禱則有水如注從

石壁中迸出須臾盈潭中有金蛤呼之聲應即雨曹志

屏風山

縣東北三十五里過此爲湖頭渡乃鄞奉之境去珠山十里
有玉泉山泉色如玉曹志

常樂寺

縣東北四十里唐乾寧中刺史黃晟建宋乾德初改名寶慶
治平初復今名後圯明永樂四年重建曹志黃刺史墓在寺後

仙跡巖

縣東十五里地名杉木樣巖洞有石佛洞前石平夷濶三丈
成五彩文有石獅子蹲踞其上成化志

鋸門山龍洞

縣東三十里鎮邑鏡已見第四十卷穿山下

錢倉所

四明談助

卷四十四

十三

郡治南二百六十一里四面際山因壘以城城周圍三里三十步明洪武二十年千戶王普築闢四門穴水門于西門之側成化志所城在象邑東北四十里突出海濱向東隔海卽鎮邑穿山霽衢昆亭等處

爵溪所

郡治南二百七十一里東南負海西北依山城周圍三里十八步明洪武三十一年千戶王恭築闢東西南三門成化志爵溪在縣東二十里源出前嶽嶺所城居縣之東南突出海濱向東對出卽海中青門牛鼻孔黃牛礁橫水洋等山
下詳自西而南而東諸山

清潭山

縣西南十里山有連珠七井深不可測山木陰翳上有石溜注水于潭石壁多菖蒲宋主簿陳震以旱禱雨立應西南十五里又有湧泉潭潭水清淺人謂龍穴亢旱則斬鵞祭之饒鼓方鳴泉即湧出或有得雲母石于潭側者

成化志

龍角巖 白蟹潭

縣西南十五里巖上有泉名白蟹潭泉蛇行斗折至山半石厓厓下巖石森列泉掛下如簾幙與石相鬪作裂帛聲跨泉一菴名飛泉上有桂林石厂龍角巖平巖諸勝游人多觴咏于此

曹志

五師山

縣西南四十里昔有五師修道於此因名山上有龍潭常涸

四明談助

卷四十四

十四

一石磨蓋其上旱時虔禱振錫誦經須臾水湧自磨空而出東流則東雨四面皆溢則大通

曹志

靈巖山

縣西南五十里巖石奇怪極其天巧有瀑布泉瀉于靈巖之上飛流濺沫迨百餘丈時有猿出沒瀑布間昔鄧仁憲廉布吳說諸公曾有題詠巖端生奇花枯檜仍有船碇之跡在

成化志

佛頭巖

縣南二十五里巖高十餘丈上有石佛中斷如蜂腰岌然欲搖動者又名搖巖四面皆蒼葛花遇夏月花開彌望如雪香聞十餘里

曹志

三萼山

縣南六十里上有三峯春時雜花交發綺麗可觀志成化

后門山

縣南一百里昌國地名后門洪武十二年先于昌國縣今定海

開設守禦千戶所十七年改縣為衛二十年起遣海島居民

革昌國縣以本衛移置象山縣三都海口東門二十七年因

東門懸海薪水不便徙今后門地志成化跨山而城為昌國衛

志曹東南大洋有牛闌門羅漢礁關帝嶼等山

昌國衛

郡南三百五十里西北跨山東南皆原野城周圍七里一十

步明洪武二十七年指揮武勝築關門四穴水門二于西南

四明談助

卷四十四

志成化本朝順治十八年遣居民入內地城毀康熙二十三年

展復如故志曹

平沙巖

昌國衛南門外海邊羣石嶙峋獨此一巖方廣數十丈平鋪

如席有細沙色黃如麪春日士人攜壺觴至此一望海天無

際志曹

東門山

縣南一百二十里漢地理志所謂天門山兩峯對峙其狀如

門有橫石如闔潮水觸激舟行險阻海道之衝要也志成化接

寧海東境高二百丈周二十五里番船往來必由此明初建

衛有昌國舊城後徙后門志曹

于綰山

縣南海中一百三十里昔于綰漁隱于此後卒而葬焉因名
再南有楊大嶼山踰此則爲東甌境

曹志

玉女山

縣西南九十里玉女南去十里有石浦山中爲石浦所

曹志

石浦所

郡治南三百七十一里東南面海西北因山城周圍六百七
丈舊隸昌國衛明洪武二十年因本衛移置東門將石浦原
設巡檢司徒於象山遂調前後千戶於石浦闢南西北三門

成化志

石浦張將軍名振

四明談助

卷四十四

十六

定西侯張公名振字侯服應天府江寧縣人崇禎癸未授台
州石浦游擊乙酉南都破安撫使至浙東公獨不受已而監
國起事加公富平將軍時肅虜伯黃斌卿以閩中之命守翁
洲翁洲與石浦相犄角錢唐師潰方國安欲以監國降監國
脫走至石浦之南田公棄石浦扈王欲保翁洲會叛將張國
柱以軍攻翁洲斌卿求救于公公破之因勸斌卿納王而斌
卿不從公計無所出適永勝伯陳彩至以其軍共扈王入閩
王晉封公定西伯初公之救斌卿也部將阮進最有功斌卿
不德公而說進使叛公北發進以不習三吳水道不從南入
閩招軍頗盛王旣進封公定西侯亦封公蕩吳伯至是公由
南田復健跳以書招進進復與公合時閩中地盡失諸將以

王復入浙公與進迎王至于健跳斌卿不至 大兵圍健跳進使人告糴于斌卿又不得于是公與諸將議海上諸島惟翁洲稍大而斌卿負固不若共討而誅之則王可駐軍乃傳檄討斌卿斌卿上表待罪請迎王以自贖公許之而進卒擊殺斌卿沉之于海監國既居翁洲進公太師當國庚寅公殺平西伯王朝先朝先本斌卿將公與進招之預平翁洲之功公頗忌之遂襲殺焉朝先部將多降于 本朝請爲向導以攻翁洲蓋公之殺斌卿爲有功而其以非罪殺朝先則有過此則不能以相掩者也辛卯秋 大兵下翁洲公以蛟關天險必不能猝渡乃留阮進守橫水洋以弟左都督名揚副安洋將軍劉世勳城守而自以兵奉王搗吳淞以牽制之兵旣

得爲之諱而以爲賢於斌卿萬萬矣

結埼亭集

句餘土音擬薤露詞

通侯女 黃貞女縫裳

通侯女尚書婦海氛不常更勝迭負我身非我有我有身我

自守不見縫裳此志已久

貞女豫卜一死縫其腰下裾甚固莫能解也

詩話威虜侯黃斌卿之女也許嫁盧尙書

若騰

之子斌卿死

女從焉斌卿臣節有玷而其女則皎皎矣

婁秀才死海上

婁秀才文煥字長明世居象山之海上少有大志文章遠出流輩落落不羣或爲誇里中邵編修景堯及第之榮以祝之秀才笑曰千里生民之業而但爾乎于是其橫舍中師友聞

四明談助

卷四十四

十八

之皆大驚憂時之亂慨然有請纓之志江東之破也秀才正衣襟哭謝先聖廟及祖祠徧詣親知與訣家人環哭而止之不可則兀立海濱之沙上俄頃海潮大至浮之而去家人爲具棺衾議以大招之禮葬之越數日海濱漁翁忽見一尸隨潮蕩漾而來視之卽秀才也面色如生相與奔告昇歸殮之莫不驚以爲神張將軍名振守石浦聞之來哭臨焉

結埼亭集

南田

四面懸海周圍一百餘里山名大佛頭高出海中諸山數百丈日本入貢船望北行以此山爲向道舊設三里村落有范畧林門朱門金砦下灣諸處地甚平廣田極豐腴雖大旱深澗不枯凡海邊塘率天設地造不假人爲山多窟鹿水多海

錯諸戶恃此爲生海中十州以南田爲第一明初起發沿海居民遂空其地云曹志古跡張忠烈公居南田事詳第十二卷居第下南田東南大洋有牛頭門下灣門茶盤急水門等山南面隔海有健跳桃渚二所其脉自寧海分山直至海濱

桃渚萬將軍廟

萬指揮武海上射龍事見四十二卷

陳元帥廟

象西南二十里相傳宋丞相宜中從子名失傳行十五少負勇畧理宗時以戰功擢大元帥德祐中伯雁入臨安宜中與張世傑奉端宗及廣王昺由越州航海而南元帥扈從舟次象境金井灣得暴疾知不可起謂左右曰吾世受宋恩生不

四明談助

卷四十四

十九

能報死當爲厲鬼殺賊遙望帝舟叩頭長慟而逝遂葬于姥嶺之麓麾下死義者四人邑民立廟塚側祀焉明嘉靖三十八年倭賊百餘屯四都海道譚綸部兵來勦夜抵象夢中見有陳元帥者語令次日午刻出兵綸异之如命而行兵次姥嶺忽與倭遇大破之及返見廟題陳元帥字因憶夢中語遂捐貲修廟更建石坊匾曰神武象民亦樹綸碑于廟云曹志

韭山

縣東南一百餘里徧地產大韭雲嵐四霽則蜃氣煥發樓臺殿閣人物龍鳳之形變幻萬狀最爲奇觀倭船常出沒于此

曹志韭山以上百里內海中有小睦大睦西殊東殊等山

大薤山

縣東南二百里自小睦至此俱海中山過此則巨浸茫茫無際曹志韭山以東歷海中桃花朱家尖等山出烏沙門卽普陀境爲東四明盡處

普陀山

在定海縣治東海洋中相距百二十里孤山獨峙縱橫各十里許周圍四十餘里統名曰普陀分之山十有三內有茶山地最廣闊中多溪澗產茶因以得名明倭奴曾據于此峯十有六巖十有七嶺十有一洞十有四壘六澗六泉六池四井三寺二曰普濟曰法雨二寺中有大菴六茅菴一百七十三時有增減不定歷代名人遊覽詩文多載普陀山志曹志

桃花山

四明談助

卷四十四

二十

定海縣治東南一百二十里多產茶田頗肥美半屬普陀僧開墾世傳安期生煉丹于此嘗以醉墨灑石成桃花紋故名曹志

朱家尖山

定海城東一百里山尖最爲聳拔可以瞭遠明倭作亂曾據于此曹志自象邑茶盤韭山至普陀先經上二山見陳炯倫海國圖

大小浴伽山

定邑東一百二十里二山與普陀接近山童無產時有苦行僧獨修于此曹志

蓮花洋

定邑東海中普陀巖佛書所謂海岸孤絕處也相傳有日本貢船歸泊洋次見觀音靈異欲載至本國臨行風浪大作滿洋開鐵蓮花船不能行懼而還之遂名蓮花洋

曹志

寶陀寺

東海梅岑山唐大中間有西域僧來燔盡十指頂禮洞前親感菩薩現大人相爲說妙法現以七色寶石後日本僧慧諤自五臺山得觀音瑞相欲返其國舟抵新螺礁不行諤禱之曰使我國衆生無緣見佛當從所向建立精藍有頃舟行竟泊于潮音洞下居民張氏目覩斯異捨所居雙峯山下卓菴奉之俗呼爲不肯去觀音院郡聞遣迎其像置城中爲民求大吉祥已而有僧卽大衆中求嘉木刻像肩戶彌月工竟而

四明談助

卷四十四

二十一

僧不見宋元豐三年內殿王舜封使三韓至此有大龜負舟不得去望山作禮忽龜沒而舟行還以其事上之賜今額嘉定七年賜圓通寶殿四字大道場三字載新梵宇八年德韶主叢林乃哀所施創龍章閣惟大士以三十二應身入諸國土現八萬四千首臂目接引羣生與五臺之文殊峩眉之普賢爲天下之大道場

成化志參寶慶志

潮音洞

去寺三里嵌巖下瞰迴顧無畔岸由寺至洞下地皆黃沙佛書所謂金沙鋪地向有大士橋亘于洞前爲潮所齧

善才洞

潮音洞右亦神通變現之地巖有罅峭峻而蹙狹其中窈不

可測外有石壁立泉溜如滴珠久而不竭人謂之菩薩泉
盤陀石

平廣可立百餘人下瞰大海正扶桑日出之地燭龍將駕天
光煥發五色爛然頃焉一輪從海底湧出其大有不得而名
者俱成
化志

元吳萊東海古跡記云補陀浴伽山俗言小白華山自山東
行西折爲觀音洞洞瞰海外巉中裂大石壁紫黑旁罅而西
岐亂石如斷圭積伏蟠結怒濤縱擊晝夜作魚龍嘯吼聲又
西則爲善財洞峭石嚙足泉流滲滴懸纓不斷前入海數百
步有礁土人云曾有老僧秉燭行洞穴且半里山石合一竅
有光大如盤盂側首睨之寬引潔白非水非土遠不辨涯際

四明談助

卷四十四

二十二

又自山北轉得磐陀石山粗怪益高疊石如垤東望杳窅想
像高麗日本如在雲霧蒼莽中日初出大如米筵海盡赤躍
跳出天末六合翕然鮮明及日光照海薄雲掩蔽空水弄影
恍若鋪金僧伽黎衣或現或滅節錄
陀段補

三摩地

在寺之西登山者由于此有亭曰極清淨嘉木森秀清泉甘
冽亂石錯出有聳而立者有倨而伏者詭形怪狀不可摹寫
眞歇巖 獅子巖

寺之深處舊了禪師修道于此有無畏石在巖前突然一石
其形仄而廣峻不可陟獅子巖在無畏石之側王趣峯在寺
之前靈鷲峯寺之左觀音峯寺之右以上俱
成化志

清淨境亭銘 明宋濂撰

補怛洛伽山者在東大洋海梵語補怛洛伽華言小白華傳
云山有二皆觀青大士示現之地其一自西竺歷羅刹鬼國
暨諸魔土始至其境其一卽華嚴大經所說善財南詢之處
蓋今所也山絕起海中周圍僅百里滿望冥茫無際翁洲遠
山隱隱天外如青螺幽閬遼夔不可名狀寶陀禪寺在山南
去寺三里至潮音洞洞脚插海張頤欲飲怒風驅濤進退擊
衝作海潮音故名洞左佛跡二印石上洞巔通穴天窻白光
注其底如月唐大中間梵僧拜洞前燔十指禱之指且盡大
士爲現身說法授以七色寶石厥後襲以爲常人以誠感輒
應或現紫金自在相或縞衣被體而縹帶貫之珠瓔紛然下

四明談助

卷四十四

二十三

懸或現千首千臂像護法大神翼衛乎後先可怖可駭稍轉
而右爲善財洞嵌巖中坼窈黑不可測外則峻巖壁立泉氤
氲滴下如珠名菩薩泉善財時現黛目粉面寶蓋華鬘皆明
潔可指數從洞折而北有石類香爐類天鏡類佛牙奇甚惟
磐陀石上最寬平可坐百人雞初號遙見扶桑五色光發照
東方盡白久之湧出日輪赤如火流光燭海波閃爍不定或
輕烟明霞左右蔽虧愈致妍麗誠奇觀也自石折而西有獅
子峯形如狻猊作跳擲之勢有象巖有佛手峯皆以其形名
有三摩地嘉木蕭森怪石駢列臥者離立者蹲欲起者迎躍
以舞者其他勝概難可以數計大抵山在海岸孤絕處重巒
複嶂蒼翠如洗紫蓀白葩濯濯滿地山丹樹高數丈絳花繞

枝鮮澤如珊瑚林黃金沙四布尤璀璨眩目可玩海水震盪
無雲自雷終日轟轟然頻伽之禽繽飛于空青中上下和鳴
彷彿如稱佛號氣象靚曠絕不類人世登高四顧神思飛動
若置身琉璃瓶中一髮塵土不得相侵誠霄壤間特勝之境
也洪武庚戌春正月部使者贛州劉君承直與寶陀大師行
丕抱杖東西遊使者曰此清淨境也盍爲亭大師乃建亭于
寺之南嶺上從三十尺衡如之左倚山右入潮音洞云予聞
從西方過十萬億國名淨土纖穢不存以黃金爲地寶樹重
重迦陵頻伽能演妙法人思至之而不能得豈意東海之區
清淨之境爲頗近之耶是宜大上顯靈于其地勒銘亭上并
叩知唯心之學者大師字太基行丕其名鄞人也銘曰

四明談助

卷四十四

二十四

大海東滙厥名惟瀛并包川洛混合坤經鯨波四繞龍島中
亭濯濯綠淨皦皦青縈片滓弗列纖塵不驚如蓮出水類鑿
含明流雲斂翳新旭爭熒金沙布地寶樹森屏巨石佛足嵌
洞潮聲大士顯瑞梵童揚靈仙帶翻縹元珠垂瓔月相穆穆
飈馭冷冷龍君持戟水伯捧旌衛茲特勝控此高冥倬彼開
士爰謀建亭莫平匪砥有覺惟楹直遡寂廓將齊櫻寧塵因
道寂境逐心清徜徉淨國周流覺城敢告來裔庸勒斯銘

普陀寺怪異

萬歷三十九年十月望日洛伽補陀寺遷入三里爲海潮寺
是日晡時寺中食鍋已受米與水若干鍾發炊矣忽懸浮五
六寸凡一日許始漸下復其處越歲閏十一月十九諸寶刹

及僧寮厨庫盡燬四十年壬子十二月五日暨四十一年癸丑正月五日補陀寺鍋漲亦如海潮

曹志

洛伽小白華

黃山谷云海岸孤陁洛伽山譯者所謂小白華山予疑此卽山礬不然何以觀音老人堅坐而不去也今洛伽山無山礬乃有一種花如瑞香而色白香之清冽似之皆其异者也

寶慶

志

句餘土音寶陀詠

梅尉梅岑

巨君安車駟馬徧山扃吳門市卒變姓名猶懼危機不可脫遠作天東海上行投竿翠碣逾蓬頂履穿四明凍雪幾千層

四明談助

卷四十四

二十五

慈水之翠謁象山之蓬頂皆有梅尉游跡

乘槎竟出大浹口吾知免矣逃吾生生

前名氏雖可埋死後孤岑翻以姓見稱東有梅岑西有嚴陵婦翁郎壻同芳馨東霍山高桐江清門闌喜氣成客星山川因之同不朽永爲赤符曜長庚斯人何藉神丹九轉成

小白華吟

詩話小白華乃瑞香也瑞香出于廬山而吾鄉有小廬山之目斯其所以產瑞香耶

吾鄉小廬山合有小白華不意風流種而歸枯禪家水仙遍水田山查滿山霏相與爲鼎足迎春放天葩老夫愛睡魔榻羽化鳳車醒來香滿袖詩思浮花茅

瑞香又名睡香又

洛伽蓮 今貢

洛伽蓮子青璠璣五色連枝飫香腴十丈長符韓子句一輪
大合竺國書海山天曠風雲氣半向此間作儲胥洛伽釋子
荷 帝德年年一斗附使車望闕焚香祝萬壽其視負暄之
獻則已侈

普濟禪寺

在白華頂靈鷲峯下供奉大士香火歷代興廢不一 國朝
順治間燬于紅毛寇獨存大殿康熙二十八年發帑金一千
兩分賜兩寺三十八年復賜五百兩 御書普濟羣靈大圓
通殿宣布聲聞潮音洞等匾額懸掛寺內雍正九年重修
法雨禪寺

在白華頂左光熙峯下萬歷中建 國朝康熙二十八年同
四明談助

卷四十四

二十六

前寺賜金重建三十八年復同前寺賜金 御書天花法雨
梵音洞額懸寺內雍正九年重修

曹志

沈家門

兼見末卷

定邑東過此卽蓮花洋明季脩倭此處爲第一險要
守寧波必從此出入始無懸礁妨礙爲東西四明水道總界
過此至衆山盡處爲盡山深水洋有花腦黃龍馬蹟諸山爲
江浙二省哨船分界處

曹志

番舶